

Երեսնամյա այսպիսին

ՄԱՅՐ ԱԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿՇԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ

Ամենայն Հայոց Կաթողիկոսն ընդունեց



Հուլիսի 31-ին

ՀՄԸՄ-ի կենտրոնական վարչության անդամներին

Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսն ընդունեց ՀՄԸՄ-ի (Հայ մարմնակրթական ընդհանուր միություն) կենտրոնական վարչության անդամներին՝ գլխավորությամբ վարչության ատենապետ Վաչե Նաջարյանի:

Տիար Նաջարյանը, Նորին Սրբությանը ներկայացնելով վարչության անդամներին, տեղեկություններ փոխանցեց Հայաստանում անցկացված համա-ՀՄԸՄ-ական 11-րդ մարզախաղերի ընթացքի մասին՝ ընդգծելով, որ Սփյուռքից շուրջ 645 հայ երիտասարդ մարզիկ է ժամանել հայրենիք՝ մարզախաղերին մասնակցելու:

Ողջունելով հյուրերի այցը Մայր Աթոռ Սուրբ Էջմիածին՝ Նորին Սրբությունն իր գնահատանքը բերեց ՀՄԸՄ-ի կենտրոնա-

կան վարչությանը հայրենիքում մեծ նախաձեռնության իրականացման համար: Վեհափառ Հայրապետը նաեւ գոհունակությամբ հայտնեց այս տարի առաջին անգամ իրականացված «Հրաշք» մարզախաղերի առնչությամբ, որոնց մասնակցեցին մտավոր եւ ֆիզիկական խնդիրներ ունեցող շուրջ 200 երեխա ու պատանի:

Հայոց Հայրապետը կարեւոր նկատեց համահայկական մարզախաղերի անցկացումը, որով հնարավորություն է ընձեռվում հայորդիներին միմյանց ճանաչելու, խանդավառվելու, լավատեսության եւ հայրենասիրության ոգով լցվելու: Հանդիպման Ամենայն Հայոց Կաթողիկոսը կարեւորեց նաեւ Սփյուռքի հանրային կյանքի աշխուժացմանն ու զորացմանը միտված յուրաքանչյուր նախաձեռնություն:

Նոր նշանակումներ

Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսի հայրապետական տնօրինությանը կատարվել են եկեղեցականների նոր նշանակումներ:

Տ. Դեմոնդ արք. Սաղաթեյանը, ազատվելով Հառիճավանքի Թրքանձյան ընծայարա-

նի տեսչի պաշտոնից, ծառայության է կոչվել Իրաքի հայոց թեմում:

Տ. Աղան քին. Մովսիսյանը ծառայության է նշանակվել Իրաքի հայոց թեմում:

Լրատվական նյութերը՝
Մայր Աթոռ Սուրբ Էջմիածնի տեղեկատվական համակարգի

ԵԿԵՂԵՑԱԿԱՆ ՏՈՒՆԵՐ

ՕԳՈՍՏՈՍ

- † Բարեկենդան Սուրբ Աստվածածնի պահոց — օգոստոսի 7
- † Տոն Շողակաթի Սուրբ Էջմիածնի — օգոստոսի 13
- † ՎԵՐԱՓՈԽՈՒՄՆ ՍՈՒՐԲ ԱՍՏՎԱԾԱԾՆԻ — օգոստոսի 14

ՏՈՒՆ ՊԱՅԾԱԴՈՒԱԿԵՐՊՈՒԹՅԱՆ

Սկիզբը՝ թիվ 13


Պայծառակերպության խորհուրդը

Պայծառակերպության խորհրդի վերաբերյալ արժեքավոր բացատրություններ կան Ընդհանրական, այդ թվում՝ Հայոց Եկեղեցու հայրերի երկերում, ճառերում (Մովսես Սյունեցի), քարոզներում (Ս. Գրիգոր Տաթևացի), Ավետարանի մեկնություններում (Եփրեմ Ասորի, Հովհան Ոսկեբերան, Ստեփանոս Սյունեցի, Սարգիս Կունդ, Իգնատիոս Սեւեռնցի, Բարսեղ Մաշկեղորցի (միայն Թ 10–12 համարները), Հովհաննես Երզնկացի (Ծործորեցի), Ս. Գրիգոր Տաթևացի, Մխիթար Սեբաստացի, Աբրահամ Կոստանդնուպոլսեցի), տաղերում (Ս. Գրիգոր Նարեկացի, Ս. Ներսես Շնորհալի), գանձերում (Ս. Ներսես Շնորհալի): Պայծառակերպությունը քննվել է Ալեքսանդրյան դպրոցին բնորոշ այլաբանական եւ Ամստերդամի աստվածաբանական դպրոցին հատուկ տառացի եղանակներով:

«Փիլիպպեան Կեսարիայից» դուրս գալուց վեց կամ ութ օր հետո Հիսուսի՝ Իր աշա-

կերտների հետ լեռը բարձրանալու դրվագն այլաբանորեն քննելիս Իգնատիոս Սեւեռնցին ու Հովհաննես Երզնկացին վեց եւ ութ օրերը համեմատել են առաջին ու երկրորդ գալուստների հետ: Տառացի մեկնաբանման եղանակը կիրառած հայրերը, ինչպես օրինակ՝ Մխիթար Սեբաստացին, վեցը համարում են միջանկյալ օրեր Հիսուսի՝ աշակերտներին ուղղված հարցման՝ «Ո՞վ է մարդու Որդին» (Մատթ. Ժ 13, Մարկ. Թ 27, Դով. Թ 18), եւ Պետրոսի դավանության (Մատթ. Ժ 16, Մարկ. Թ 29, Դով. Թ 20), ինչպես նաեւ պայծառակերպության օրերի միջեւ, իսկ ութը՝ այդ երկու օրերը ներառյալ:

Պայծառակերպությանը երեք առաքյալների ներկայությունը բացատրվում է նաեւ նրանց՝ տասներկուսի մեջ առանձնաշնորհյալ լինելու համոզմանը: Նրանք միասին ներկա են եղել նաեւ Հայրուսի աղջկա հարությանը (Մարկ. Ե 35–42, Դով. Ը 40–55), Գեթսեմանիի պարտեզում աղոթքին (Մատթ. Ի 26 36–46, Մարկ. Ժ 32–42): Առաքելական եռյակի առանձնաշնորհյալ լինելը վկայում է նաեւ Պողոս առաքյալը գաղատացիներին ուղղված թղթում. «...Հակոբքսը, Կեփասը եւ Հովհաննեսը, որոնք սյուներն էին համարվում» (Գաղ. Բ 8): ➔ Էջ 2



ՏՈՆ ՊԱՅԾԱՌ-ԱԿԵՐՊՈՒԹՅԱՆ

← էջ 1

Տասներկուսից երեքին ընտրելու կարելու պատճառ էր նաեւ այն, որ Հուդան արժանի չէր աստվածային տեսությանը, իսկ եթե Տե-րը տասներկին բարձրացներ եւ միայն Հուդային թողներ, ապա նրա մատնիչ լինելը հետագայում գուցե արդարացվեր (Սարգիս Կունդ, Հովհաննէս Երզնկացի): Մարգարե-ներից Մովսէսի ու Եղիայի ներկայութիւնը կապվում է Հիսուսի փրկագործական առաքելությունը ողջերին (ի դէմս Եղիայի) եւ մահացածներին (ի դէմս Մովսէսի) վե-րաբերելու հետ: Մովսէսը՝ որպէս օրէնսդիր, իսկ Եղիան՝ իբրեւ օրենքի նախանձախնդիր, իրենց ներկայությամբ հավաստում էին, որ Հիսուս չի մերժում Հին օրենքը, այլ հավա-սարապես Տեր է Հին ու Նոր Ուխտերի:

Առաքյալների եւ մարգարեների ներ-կայությունը խորհրդանշում է Հին օրենքի լրումն ու Նորի սկիզբը: Ինչպէս Հին Կտա-կարանում Քորեբ լեռան վրա Մովսէսին աստվածային տեսիլքով տրվեց Տասնաբա-նյան, այնպէս եւ Թաբոր լեռան վրա աստ-վածային տեսությամբ Նոր օրենքը տրվեց Նոր Ուխտի սպասավորներին՝ առաքյալնե-րին, եւ այդպիսով հաստատվեց նոր եկեղե-ցու հիմքը:

Ըստ մեկնիչների՝ Հիսուս ցույց է տալիս իր աստվածությունը, որպէսզի երբ խա-չի վրա չարչարվի, աշակերտները չմե-ղանչեն՝ մտածելով, որ եթե Աստված է եւ Աստծու Որդի, ապա ինչու է տանջանքներ կրում իրեն ազատելու փոխարեն, այլ հաս-կանաւ, որ փառքն ի սկզբանէ ուներ եւ ոչ թե չարչարանքների գնով ձեռք բերեց, իսկ չարչարանքները ոչ թե հարկադրաբար է կրում, այլ կամավոր՝ համուն մարդկության մեղքից ազատագրման: Աստծու Որդին Իր փառքը ցույց է տալիս նաեւ, որ հալածանք-ների ժամանակ աշակերտները հիշեն, որ Տիրոջ անվամբ չարչարվողները նույնպէս նման փառքի են արժանանալու:

Պայծառակերպությունն ամբողջացնում է նաեւ փրկագործության խորհուրդը. այն խորհրդանշում է Հիսուսի երկրորդ գալուս-տը (առաջին գալուստյան կարապետի մա-սին ետային (Է 14), իսկ երկրորդի՝ Մաղա-քիան (Դ 4–5) է մարգարեացել): Առաջինը Սուրբ Ծննդյամբ իրագործվել է, իսկ երկ-րորդն սպասվում է: Պայծառակերպության ժամանակ հայտնվում է Եղիա մարգարեն, որը լինելու էր երկրորդ գալուստյան նախա-կարապետը (Բարսեղ Շնորհալի, Հովհան-նէս Երզնկացի, Մխիթար Սեբաստացի):

Պայծառակերպության լեռը

Պայծառակերպությունը, իբրեւ Հին եւ Նոր օրենքները միավորող, առաջին ու երկրորդ գալուստները խորհրդանշող իրողություն, դիտարկվում է նաեւ որպէս առաջին եկեղե-ցու սկզբնավորում: Իբրեւ նշյալ իրողության հիմնավորում՝ մեկնիչները վկայաբերում են Պետրոսի՝ երեք տաղավար շինելու վերա-բերյալ առաջարկը (Մատթ. ԺԷ 4, Մարկ. Թ 4, Ղուկ. Թ 33), որոնց տեղում հետագայում երեք եկեղեցի է կառուցվում (Հեղինէ կայս-րուհին լեռան վրա հիմնել է տաճար: Ը դա-րում այստեղ վանք է եղել, սակայն այսօր պահպանվել են միայն Հեղինէի հիմնած տա-ճարի բեկորները): Ի դէմս երեք առաքյալնե-րի՝ Տերը հոգեղեն եկեղեցի է հիմնադրում:

Մեսրոպ քին. Արամյանը գրում է, որ ըստ եկեղեցու հայրերի՝ պայծառակերպությունը մինչեւ Տիրոջ հարությունը բարձրագույն հայտնությունն է եւ իր մեջ խտացնում է մարդկային փրկաբանական անցյալը (Հին Կտակարան), ներկան (Նոր Կտակարան) եւ ապագան (երկրորդ գալուստ):

Եկեղեցական ավանդությունը վկայում է, որ Հիսուսի պայծառակերպությունը տեղի է ունեցել Թաբոր լեռան վրա: Եկեղեցու հայ-րերը հիշատակում են նաեւ Հերմոնը կամ որ նույնն է՝ Սիոնը (Սիոնը Հերմոն կոչված բարձրավանդակներից մեկն է, ուստի Սիոն կամ Հերմոն ասելով՝ չպետք է առանձին լեռներ հասկանալ), Սինան (նույն լեռնաշղ-թայի տարբեր ծայրերը կոչվում են Քորեբ եւ Սինա, սակայն այս երկու անվանումնե-րը երբեմն տրվում են ամբողջ լեռնաշղթա-յին), այլաբանորեն հիշատակում են նաեւ դրախտը: Սակայն եկեղեցական մատե-նագրության մեջ առավելապէս վկայակոչ-վում է Թաբոր լեռը:

Հարցը կարելի է դիտարկել ավանդու-



թային, այլաբանական եւ աշխարհագրա-կան տեսանկյուններից:

Դրախտ

Ըստ Հովհաննէս Երզնկացու՝ «Լեռան բարձր ոմանք զդրախտն ասեն, քան-զի բարձր է, քան զաշխարհ՝ հաւասար լուսնական գնդին եւ առանձին պատեալ քերթելիք եւ բոցեղէն սրով զատեալ ի հողեղինացս բնութենէ, որում եւ ես դաշ-նակից գոմ, քանզի յարութեան էր տեսիլն ապացոյց, եւ յարութիւնն ոչ այլ ինչ է, քան թէ առաջին փառացն կանգնումն, վասն անդ տարեալ եցոյց աշակերտացն զխոր-հուրդ յարութեան»:

Ս. Գրիգոր Տաթեւացին ընդգծում է, որ դրախտը խաչով բացվեց. «Նախ՝ զի խա-չիւն բացաւ դրախտն աւազակին», ապա հավելում՝ «Եհան ի լեռան էւ եցոյց նոցա առանձինն եւ չքնադատեսութիւն: Յայս զարքայութիւն երկնից, զի չէին տեսեալ մարդիկ, յորմէ հետէ զրկեցաւ Ադամ: Վասն այն բարձր եւ առանձինն ասէ»: Այսինքն՝ «բարձր եւ առանձին է ասում», քանի որ այն համեմատվում է երկնքի արքայության՝ դրախտի հետ, որից մարդիկ Ադամի պատ-ճառով զրկվել էին:

Թաբորը երկնային արքայության՝ Վերին Երուսաղեմի հետ է համեմատում ԺԱ դարի աստվածաբան Հովհաննէս Կոզեմ Տարո-նեցին. «...ի լեռան Թափովը, որ թարգմա-նի էջը հոգոյ եւ նախադուռն եւ նմանութիւն մաւրն մերոյ վերինն Երուսաղեմի...»:

Եղիշեն պայծառակերպությանը նվիր-ված ճառում գրում է, որ դրախտ կարող էր անվանվել Թաբոր լեռն իր եղեմական գե-ղեցկության համար. «Այն գալիլեացիների երկրում մի մեծ դաշտի մեջ է... բարձր ու բոլորամիտ է, շուրջն ինքնաբերւի ջրհոր-ներ, բազմաթիվ խիտ ու թավ անտառներ

կան, որոնք անձրեւաբուխ ամպերի շնոր-հիվ պտղաբերում են... Շավիղը, որով Տերն է բարձրացել, շիփ-շիտակ է, եւ այս ու այն կողմում ճանապարհ է հյուսված... Լեռան կատարը հովտածէ գոգավորու-թյուն ունի»:

Հավանաբար Թաբորի՝ մյուս լեռներից անջատ լինելու պատճառով ավետարանիչ-ները պայծառակերպության լեռան անու-նը չեն հայտնում, քանի որ հիշատակելով «բարձր եւ առանձին»՝ ինքնին հասկանալի է, որ խոսքը Թաբորի մասին է:

Բացի այդ, ըստ հիշատակությունների, առաջին քրիստոնյաներն են վկայում, որ պայծառակերպությունը տեղի է ունեցել Թաբոր լեռան վրա: Կղեմէս Ալեքսանդրա-ցին եւ Հերոնիմոսն այդ մասին ավանդու-թյուն են գտել: Ավանդությունը, անշուշտ, հաճախ անվիճելի է:

Հովհաննէս Երզնկացին վկայակոչում է հասարակաց խոսքն ու մարգարեությունը. «Բայց հասարակաց բանն զԹաբոր ասէն, եւ վկայ առեալ զբան մարգարէին, թէ Թա-բոր եւ Հերմոն յամուն քո ցմեացեն: Ասէ եւ Պետրոս, թէ ունիմք հաստատագոյն զբանս մարգարեական, որում եթէ անսայցեք, բար-ւոց առնեք»:

Պետրոս առաքյալը, իր ընդհանրական Բ թղթում հիշատակելով Հիսուսի պայծառա-կերպությունը, լեռան անվանումը չի նշում, այլ այն սուրբ լեռ է որակում (Ա 14):

Բացի այդ՝ որպէս հնագույն շրջանի եգա-կի գրավոր աղբյուր՝ Թաբորի մասին վկա-յուն են պարականոն գրվածքները:

Թաբոր բառացիորեն նշանակում է լու-սավորյալ, ընտրություն, մաքրություն, ինչը համընկնում է լեռան վրա տեղի ունեցած պայծառակերպության իրողությանը: Ասո-րերենով այն խորտակում կամ բեկում է նշանակում: Այս իմաստով դիտարկելով՝ կարելի է հասկանալ, որ Թաբորի վրա տե-ղի ունեցած պայծառակերպությունն իրա-

պէս բեկում էր մարդու համար, քանի որ նա արժանանում է դրախտային փառքի տեսությանը, որից զրկվել էր:

Այսպիսով՝ դրախտը որպէս պայծառա-կերպության վայր դիտարկելն այլաբանո-րեն բացատրվում է Քրիստոսի պայծա-ռակերպությամբ դրախտային կորուսյալ փառքի հայտնությամբ, իսկ բառացիորեն՝ Թաբորի գեղեցկությամբ: Պատահական չէ, որ մարգարեները եւ լեռները համեմատել են երկնային արքայության հետ. «Եւ տուն Աստուծոյ՝ ի վերայ գլխոց լեռանց, եւ բարձ-րացի ի վերայ բլրոց, եւ եկեացեն ի մա ամենայն հեթանոսք» (Ես. Բ 2), կամ՝ «Եւ ոչ մեղիցեն եւ ոչ կարացեն հարկանել զորք ի լեռին՝ սրբութեան իմոյ» (Ես. ԺԱ 9):

Հերմոն (Սիոն) եւ Սինա լեռներն աշ-խարհագրորեն ավելի հեռու են գտնվում Գալիլիայից: Հերմոնը Գալիլիայից դեպի հյուսիս-արեւելք է ընկած: Այն ոչ միայն աշ-խարհագրորեն այլ վայրում է գտնվում, այլ նաեւ շատ բարձր է՝ բուսականությունից զուրկ եւ մշտապես ձյունածածկ, ինչն ան-հավանական է դարձնում Հիսուսի եւ Իր աշակերտների՝ այդ լեռը բարձրանալը:

Սինան, թեեւ բարեբեր է, ունի ջրի բա-զում ակունքներ, բուսական եւ կենդա-նական աշխարհ, սակայն այն նույնպէս Գալիլիայից հեռու է ընկած՝ դեպի հարավ-արեւմուտք՝ Կարմիր ծովի եւ Աքայաբի ծո-ցի միջնամասում: Բացի այդ՝ Սինայի վերին մասն անկանոն շրջանակի ձեւ ունի՝ երե-տուն կամ քառասուն մղոն տրամագծով:

Սինա լեռան վրա Մովսէսին տրվեց Հին օրենքը (Ելից ԺԴ 12–18): Հովհաննէս Երզն-կացին նշում է. «Իսկ կէսք զսինեականն ասեն անուանէ գագաթն, որ է բարձր եւ առանձինն, յորում զօրէնսն ընկալան, եւ երեսքն Սօսիսի պայծառացան, որ յայտնա-պէս զայսր պայծառութեան խորհուրդ նկա-րէր: Նաեւ յայնմ վայրի թաղեցաւ իսկ Սօ-սես եւ անդր փախստական չոգաւ: Հեղիաւ, զորս կոչեաց դարձել եւ եցոյց զփառս աս-տուածութեանն»: Ինչպէս Սինայի վրա Հին օրենքը տրվեց Մովսէսին, այնպէս եւ Թաբորի վրա պայծառակերպությամբ Հին Ուխտի ներկայացուցիչների առջեւ Նոր օրենքը Տերը տվեց առաքյալներին, որոնք կոչված էին Նոր Ուխտի կրողներ եւ տարա-ծողներ լինելու:

Սիոնի վրա հաստատվեց Դավթի ամրո-ցը. «Եւ առ Դաւիթ զՍիոն եւ զամրոց նորա. այն է քաղաք Դաւթի» (Բ Թագ. Ե 7, 9): Ըստ Հովհաննէս Երզնկացու՝ «Իսկ ոմանք զՍիոն ասեն լեռան, յորում Դաւիթ զամրոցն շի-նեաց, զոր եւ Պետրոս ի սոյն տեսութեան պատմութեան՝ սուրբ լեռան անուանէ, թէ ընդ մնա իսկ էաք ի սուրբ լեռինն: Ըստ Դաւ-թի՝ թէ հիմունք նորա ի լեռան սուրբ նորա, յորում հիմնարկելոց էր զխորհուրդ վերին Սիոնին»: Դավթը Սիոնը բնորոշում է որ-պէս Աստծու քաղաք (Սաղմ. ԽԷ): Հետա-գայում Սողոմոնը Երուսաղեմում, որտեղ գտնվում էր Սիոն լեռը (դրա համար քաղա-քը հաճախ Սիոն էր կոչվում), կառուցում է Տիրոջ տաճարը (Գ Թագ. Ը 5–8): Այսինքն՝ ինչպէս Սիոնի վրա Տիրոջ երկրավոր նա-խահայր Դավթի արքայական ամրոցն էր եւ Տիրոջ երկրային տաճարը, այնպէս եւ Թա-բորի վրա Հիսուսի երկնային արքայության օրինակն էր եւ եկեղեցու նախորինակը:

Այսպիսով՝ այս երկու լեռները եւս պայ-ծառակերպության հետ խորհրդաբանորեն են կապվում. Սինան՝ որպէս Հին օրենքի, իսկ Թաբորը՝ իբրեւ Նոր օրենքի տվու-թյան վայր, Հերմոնը՝ որպէս Դավթի ար-քայի ամրոց եւ սողոմոնաշեն տաճարի վայր: Թաբոր լեռան մասին են վկայակո-չում ա. մարգարեական խոսքը՝ «Թաբոր եւ Հերմոն յամուն քո ցմեացեն» (Սաղմ. 2Ը 13), բ. Սրբազան ավանդությունը, գ. պարականոն գրականությունը, դ. ան-վան ստուգաբանությունը, ե. լեռան նկա-րագրությունը: Հիշատակված մյուս լեռ-ները՝ Հերմոնը (Սիոն), Սինան, ինչպէս նաեւ դրախտը պայծառակերպության հետ խորհրդաբանորեն են կապվում:

Պայծառակերպությունն ամբողջացնում եւ իր լրումին է հասցնում փրկագործության խորհուրդը՝ այլաբանորեն ներկայացնելով կորուսյալ դրախտից մինչեւ երկրորդ գա-լուստը:

Հասմիկ ԱՐԲՅԱՍՅԱՆ
Պատմական գիտ. թեկնածու

Ս. Ներսես Շնորհալու ստեղծագործությունների մանկավարժական բնույթը

«Վիպասանութիւն» պոեմը՝ որպէս հայ ժողովրդի պատմության դասագիրք

Սկիզբը՝ թիվ 9–13

«Վիպասանութիւն» ստեղծագործությունը ճիշտ հասկանալու եւ վերլուծելու համար անհրաժեշտ է որոշակի պատկերացում ունենալ Ս. Ներսես Շնորհալու կյանքի եւ ապրած պատմական ժամանակաշրջանի մասին: Առհասարակ ուսուցման գործընթացն առավել բարձր արդյունավետություն կարող է ունենալ, եթե իրականացվում է ոչ թե մեկ, այլ մի քանի մեթոդների համադրմամբ: Միաժամանակ շատ կարելի է նյութին համապատասխան ճիշտ գործիքակազմի եւ միջոցների ընտրությունը: Ս. Ներսես Շնորհալու կենսագրությունը, ժամանակաշրջանի բնութագիրը կարելի է ներկայացնել «դասախոսություն» մեթոդի միջոցով: Պատմական անդրադարձը տալիս է մաեւ միջառարկայական (Յայոց պատմություն, համաշխարհային պատմություն, Յայ եկեղեցու պատմություն) կապեր ստեղծելու հնարավորություն: Տեխնոլոգիական հագեցվածության մեր դարաշրջանում դժվար է աշակերտի համար դասը հետաքրքիր դարձնել միայն ավանդական մոտեցումների եւ միջոցների կիրառմամբ: Ուսուցիչը, բանավոր խոսքին զուգահեռ, կարող է դիմել «տեսամեթոդի» կիրառմանը: Խոսքի եւ պատկերի զուգակցման դեպքում տեղեկության ծավալի ընկալումն առավել մեծ է լինում: Աշակերտներին կարող են ցուցադրվել Ս. Ներսես Շնորհալու,

մրա ստեղծագործությունների ձեռագիր եւ տարբեր տարիների տպագիր տարբերակների, Կիլիկյան Յայաստանի մշակավոր վայրերի լուսանկարները:

Ս. Ներսես Շնորհալին իր պոեմը գրելիս հիմնականում օգտվել է Մովսես Խորենացու «Յայոց պատմություն»-ից, ինչին աշակերտներն արդեն իսկ ծանոթ են: «Վիպասանութիւն» ստեղծագործության ուսուցումն սկսելուց առաջ կարելի է կիրառել «մտազրոհ» մեթոդը՝ Մովսես Խորենացու «Պատմութեան» եւ դրա առանցքային դրվագների վերհիշման մպատակով: Սա խմբային աշխատանքի պարզագույն, բայց արդյունավետ եւ դյուրին կիրառելի մեթոդներից է: Ուսուցիչը գրատախտակին գրում է «Մովսես Խորենացի. Յայոց պատմություն», որից հետո աշակերտներն անցնում են առանցքային հասկացությանն առնչվող բառերի, բառակապակցությունների կամ մտքերի թվարկմանը: Մեթոդն արդյունավետ է կիրառել դասի խթանման փուլում, ինչի շնորհիվ ուսուցիչը հստակ պատկերացում կկազմի աշակերտի մնացորդային գիտելիքների մասին, ամիրաժեշտության դեպքում մոր նյութի հաղորդումը կիրականացնի այդ գիտելիքների լրացմամբ կամ ճշգրտմամբ:

Բուն նյութի ներկայացման՝ իմաստավորման փուլում մպատակահարմար է աշակերտներին «Վիպասանութիւն» պոեմին ծանոթացնել «գրույցի» միջոցով: Մով-

սես Խորենացու մասին գիտելիքները եւ խթանման փուլում անդրադարձը հնարավորություն կտան ուսուցչին այս մեթոդին դիմելու: Ուսուցիչը կներկայացնի ստեղծագործության տեսակը, գրության մպատակները, դիպաշարը (սյուժե) ու կերպարները: Ստեղծագործության վերլուծության ընթացքում տարբեր հարցեր առաջադրելով՝ ուսուցիչը տեսանելի կդարձնի Մովսես Խորենացու ավանդները, աշակերտներին կմղի ինքնուրույն դատողությունների, եզրահանգումների եւ ընդհանրացումների: Պոեմի կառուցվածքն ու դիպաշարը ուսուցչի հետ միասին քննելով՝ աշակերտներն առավել լավ կընկալեն Ս. Ներսես Շնորհալու գլխավոր դասը՝ հայրենասիրությունը:

Դասը կարելի է ամփոփել (կշռադատման փուլ) ամրապնդող հարցերի օգնությամբ.


1. Ինչ մպատակ է հետապնդել Ս. Ներսես Շնորհալին «Վիպասանութիւն» ստեղծագործության գրությամբ:

2. Ինչ աղբյուրներից է օգտվել Ս. Ներսես Շնորհալին:

3. Որո՞նք են պոեմի առանցքային կերպարները:

4. Ո՞րն է ստեղծագործության գլխավոր դասը:

Անհրաժեշտ է նշել, որ «Վիպասանութիւն» պոեմի ուսուցումը դպրոցում կարող է հարուցել որոշ դժվարություններ, քանի որ այն փոխադրված է աշխարհաբարի: Սա անհնար է դարձնում բնագրային հատ-



վածների ընթերցումը, ինչն իր հերթին լուրջ խոչընդոտ է ստեղծագործության ուսուցման գործընթացում:

Գոռ ԳԱԼՍՏՅԱՆ
ԵՊՀ-ի աստվածաբանության
ֆակուլտետի ասպիրանտ,
ՀՊՄՀ-ի բանասիրական ֆակուլտետի
մագիստրոս

Բաֆֆու «Դավիթ Բեկ» պատմավեպը

Սկիզբը՝ թիվ 11–13


Խոսում են. «— Մի մարդով ոչինչ չի դառնա: — Այդ մի մարդը կդառնա հարյուր, իսկ հարյուրը՝ հազարներ» (էջ 249): Եվ ահա այդ *մեկ մարդը*՝ Դավիթ Բեկը, քառասուն քաջերի՝ իր զինավառ խմբով ոտքի է ելել եւ դիվանագիտորեն պատրաստ, Մեծ Սյունիքի եւ Փոքր Սյունիքի (Դարաբաղ կամ Արցախ) զավաճեցումն տիրող իրավիճակին ծանոթ, մեկիքների քաղաքական կողմնորոշումներին տեղյակ՝ սկսում է իր ռազմական գործողությունները: Կենտրոնը Տաթևն էր: Նրանց աջակցում էին մաեւ հոգեւոր հայրերը՝ Տաթևի վանահայր, Սյունյաց աշխարհի հոգեւոր առաջնորդ՝ Ներսես արքեպիսկոպոսը, Մովսես եպիսկոպոսը, հայր Խորենը, որոնք եւ զենք են տեղափոխում, եւ ազատագրական ոգի հրահրում ստրկության դատապարտված ժողովրդի մեջ, ուժ ու կորով ներշնչում:

Առանձին դրվագներով ներկայացվում է մեկիքությունների, զավառական կենտրոնների, առանձին բնակավայրերի ազատագրումը: Առաջին հաջողությունը Ուշ-Թեփեի կարաչոռլուների ցեղին փախուստի մատնելն էր եւ ունեցվածքը գրավելը: Շինուհայրն ապստամբների կողմն է անցնում առանց կռվի, իսկ տեղի հայերը միանում են Բեկի խմբին: Յաջորդը պարսիկների ջվանշիր ցեղն էր, որ 16 000 աշխարհազորով գալիս է մրա դեմ եւ երկու օր ու գիշեր տեւած կռիվներից հետո ջախջախվում: Կոտորվում են մաեւ ջվանշիրներին օգնության եկած պարսկական Կուրթար ավանի բնակիչները:

Դավիթ Բեկի սարսափը տարածվում է, իսկ դրան բնականորեն մպատասխան ռազմական հաջողությունները եւ պատերազմական իրավիճակով պայմանավորված խստությունները: Սարսափը ռազմական գործողություններից առաջ է ընկնում եւ մախապատրաստում հաջողությունը:

Ազատագրական մեծ շարժմանը մասնակցում են հանրության բոլոր դասերը՝ հոգեւորականներ, շինականներ, կանայք...

Հոգեւորականների մասնակցությունը



իրաշալի է Վարդանանց տոմի դրվագում. Ներսես արքեպիսկոպոսը պատարագ է մատուցում, քարոզ կարդում, աղոթք անում եւ ոգեկոչում ազգի հերոս սուրբ Վարդանին: Եկեղեցին իր ունեցվածքից թանկարժեք սկիհներ ու անոթներ է նվիրում ձեւավորվող բանակին, այսինքն՝ ազատագրական գործին մասնակցում է թե ոգեպես, թե նյութապես, թե զաղափարապես: Նաեւ այսպես է շարունակվում հաղթական պատերազմը:

Ընդհանուր ոգեւորության խանդավառությամբ գործողության մեջ են մտնում մաեւ հայոց աշխարհի փափկասուն տիկնայք՝ իրենց ոսկեղեն զարդերի նվիրատվությամբ, քաջությամբ, անելանելի վիճակներից ելք գտնելու հնարամտությամբ: Եվ, ընդհանրապես, Բաֆֆին շատ ուշադիր է կանանց կերպարների հարցում: Ըստ էության՝ «Դավիթ Բեկ»-ը տղամարդկանց վեպ է, բայց եւ անպակաս են կանայք, որոնց հետ ոչ միայն սերն է թեւածում, այլ մաեւ խելքն ու հերոսությունը: Կանանց կերպարները թե այս վեպում եւ թե ընդհանրապես Բաֆֆու վիպագրության մեջ առանձին խոսակցության նյութ են:

Վարդանանց տոմի արարողության ժամանակ բերում են գերի ընկած մեկիք Դա-

վիթ Ուրացողին, որն ամեն ինչ անում էր Դավիթ Բեկի գործունեությունը խափանելու համար: Նրան աջակից էին պարսիկ կնոջից ծնված որդին Շահ-Կուլի անունով, եւ Ֆաթալի խանի զորաջոկները: Եվ հորը, եւ որդուն դավաճանի անպատիվ մահ է սպասում: Ուրացողից թալանված մի կին երկաթե գամը դնում է Շահ-Կուլիի գլխին եւ օթակով այնպես զարկում, որ մեխը մտնում է գլխի մեջ:

Ջարմանք է հարուցում Դավիթ Ուրացողը, որը բարոյապես այնքան էր ընկել, որ պարսից լուծը գերադասում էր անկախ հայ պետականությունից: Ժողովուրդը որքան էլ ման լինի փափուկ մոմի, ճիշտ ղեկավարության դեպքում կարող է դառնալ ահեղի ուժ, եւ հիմա այդ ուժի առջեւ ժողովրդին փչացնող ու բարոյալքող Ուրացողն է: Որպես մահապարտ՝ մրան թարս մատեցնում են մի սեւ ավանակի վրա, սանձի փոխարեն ձեռքը տալիս ավանակի պոչը եւ քշում հրապարակ, ուր դահիճն իր գործն է անում եւ կտրված գլուխը ցցում միզակի ծայրին ու ժողովրդի ցնծության ներքո օդ հանում: Ուրացողին գլխատելուց հետո Սատանի կամրջից Որոտան գետն է թափվում մաեւ մրա ամբողջ պիղծ ազգուտակը: Այո, դավաճանները պիտի պատժվեն, թշնամին պետք է ոչնչացվի, սա է պատերազմի օրենքը: Հակառակ դեպքում տեղերը փոխվում են:

Բաֆֆին մեկ անգամ չէ, որ խիստ խոսքեր է ասում թշնամիների ճնշումից խեղճության ու ստրկության դատապարտված, ազատության մասին չնտածող եւ ազգային ինքնությունը կորցրած իր ժողովրդի մասին: Այստեղ սրբագանի հետ գրուցելիս խոսքը տալիս է Բայինդուր իշխանին. «Աստված է վկա, այդ ժողովուրդը մորթելու է արժանի»: Ազգին համեմատում է անբարոյական կնոջ հետ եւ շարունակում. «Մեր ազգը մի այսպիսի անբարոյական կին է. մա մի մեծ պոռնիկ է, մրա երեսին ամոթի եւ պատվի մի կաթիլ անգամ չէ մնացել:

Մոտ չորս հազար տարի մա պոռնկություն է անում, բայց տակավին չկշտացավ, չհագեցավ օտարներից: Ասորեստանցին դարերով գործ դրեց մրա վրա իր անբարոյական կրքերը: Հազարավոր տարիներ անցկացրեց մա՝ երբեմն հույնի, երբեմն պարսիկի, երբեմն հռոմեացու գիրկն ընկնելով: Մինչեւ անգամ անապատի արաբը իր հաստ շուրթերով շոշափեց մրա երեսը: Մինչեւ անգամ Թուրանի տափակաքիթ, դեղնակաշի մոնղոլ դարերով պառկեց մրա հետ» (էջ 288): Անարգված կնոջ հետ այս համեմատությունից հետո մա դեմ շարունակում է՝ միեւնույն է, ես սիրում եմ այդ կնոջը. «Սիրում եմ ատելով, սիրում եմ զզվելով... բայց սիրում եմ» (էջ 288):

Սիրուց, բայց մաեւ խաբված սիրուց բխած այդ ատելությունն էլ հանում մույն սիրո էր, եւ պատահական չէ, որ հայրենիքի փրկության առաջին գրավականը, անձնագրի անհատի հետ մեկտեղ, Բաֆֆին համարում է ազգային սերը: Ինչհիւ է Բաֆֆին հայոց պարտությունների պատմությունը նմանեցնում անառակ կնոջ ընկած վարքին՝ մի օր սրա հետ, մի օր՝ մրա: Այդպես, որովհետեւ հաղթանակի հուշարձաններն էլ են կերտվում կնոջ կերպարով՝ որպես Մայր հայրենիք: Կնոջ արժանապատվությունն արդեն իսկ հաղթող երկրի խորհրդանշան է. նշանակում է՝ տղամարդու իր պատիվը գետնով չի տվել:

Բնակավայրերի ազատագրման խանդավառ տարերքը շարունակվում է: Ծավալով ամենից շատ էջեր են հատկացված Ձեւու բերդի գրավմանը (Ձեյվա, Գեղի, գտնվում է Կապանում, չպետք է շփոթել Ձեյվա ամրոցի հետ, որը Գյուլիստանում է): Այս գլխում առավելագույն նրբությամբ է փայլատակում Բաֆֆու ռազմագիտական, ռազմավարական ու մարտավարական տարերքը: Ձեւուի առումը մահացու հարված էր թուրքերին, որովհետեւ Յայաստանում ոչ միայն պարսիկներն էին, այլեւ թուրքերը:

Ինչպես բերդի պաշարումը, այնպես եւ գրավումը երեւակայության հնարամիտ դրսեւորումների մի շատ հետաքրքրական ցանց են հյուսում: ➤ էջ 5

ՄԻՏՐՈՂՈՒՄ ԱՆՏՈՆԻ ՍՈՒՐՈՒՄԻ ԱՊԱՇԽԱՐՈՒԹՅԱՆ ԲԵՐԿՐԱՆՔԸ

1983 թվականի Սուրբ Ծննդյան պահքի զրույցներից


Սկիզբը՝ թիվ 13

«Ավելի մեծ սեր ոչ ոք չունի, քան այն, որ մեկն իր կյանքը տա իր բարեկամների համար» (Հովհ. Ժե 13): Պողոս առաքյալը, խոսելով Քրիստոսի մասին, գրում է, որ հազիվ թե մեկը պատրաստ լինի մեռնելու իր ընկերոջ համար, իսկ Քրիստոս մեռավ մեզ համար այն դեպքում, երբ մենք թշնամի, օտար էինք Նրան: Քրիստոս մեռավ ոչ միայն մեզ համար, ովքեր ճանաչեցին Իրեն եւ դարձան Իր աշակերտները, այլ նաեւ մեզ համար, ովքեր դատեցին Իրեն անօրեն դատաստանով, եւ խաչին գամված՝ աղոթեց Իրեն խաչողների համար. «Ներիր մեզ, Հայր, քանի որ չգիտենք, թե ինչ ենք անում»: Եվ ահա յուրաքանչյուրս միշտ պետք է խորհենք այս հարցի շուրջ՝ «Արդյոք ես քրիստոնյա եմ: Որեւէ մեկը կարող է իմ միջոցով ճանաչել Քրիստոսին, զգալ իմ սրտում Նրա սիրո առկայությունը: Որեւէ մեկը կարող է իմ խոսքերում եւ մտքում գտնել աստվածային իմաստությունն ու ճշմարտությունը, իմ արարքներում (թե ինչպես եմ ես վերաբերվում կյանքին, մարդուն եւ Աստծուն) տեսնել աստվածային ճանապարհը»:

Պողոս առաքյալն ասում է, որ կգա մահը, իսկ մահից հետո՝ դատաստանը: Այո... Ամենքիս ընդառաջ կգա մահը, եւ մեզանից յուրաքանչյուրը վաղ թե ուշ (մեզ համար անիմանալի է, թե երբ) կկանգնի Աստծու դատաստանի առջեւ: Եվ Քրիստոս խիստ խոսքեր կարտաբերի: Դատաստանն անողորմ կլինի մեզ համար, ովքեր չեն եղել ողորմած, այլ՝ անգութ, անսիրտ ու անսեր: Ոչ թե այն պատժառով, որ Աստված էլ այնպես «անգութ» եւ «անսեր» է, ինչպես մենք, այլ որովհետեւ փրկությունն աստվածային սիրո անդադար հոսքն է, սիրով միացումը սիրուն: Իսկ եթե մեր մեջ չկա այդ սերը, եթե չունենք սիրելու, անկեղծ լինելու ունակություն, մեր սրտում չունենք սիրո ծարավը, ապա անկարող ենք միանալ աստվածային սիրուն: Եվ մենք, ինչպես մշուկ է Դոստոևսկին, հանկարծ կհայտնաբերենք, որ սերն է եղել մեր կյանքի միակ իմաստը, իսկ մենք ամբողջապես իմաստազուրկ ենք մեր կյանքը եւ անկարող կլինենք անգամ ընդունել այն իմաստը, որն Աստված կարող է շնորհել մեզ:

Աստվածային դատաստանն այն չէ, որ Աստված մտաբերի մեր գործած բարիքները կամ արժեւորի հավատին առնչվող գործերում մեր «վարպետությունը»: Խորհե՛ք ավետարանական այն դրվագի շուրջ, որը նախորդում է Մեծ պահքին. [մտաբերե՛ք] Քրիստոսի առակը ոչխարների եւ այծերի մասին: Այնտեղ առաջադրված բոլոր հարցերը հանգում են հետեւյալին. երբ դու ապրում էիր երկրի վրա, քո սիրտը կամրծր էր որպես քար, թե՛ կենսունակ: Դու կերակրե՛լ ես քաղցածին: Ձերմացրե՛լ ես մեռածին: Դու մտածում էիր: Հագցրե՛լ ես մերկին: Այցելե՛լ ես բանտարկվածին ու լքալիմ: Խիղճ ունեցե՛լ ես արդյոք, թե՛ միայն անտարբերությունը, ամբարտավանությունն ու ինքնահավանությունն են բնակվել քո [հոգում], ինչպես այն հարուստի [հոգում], որը խնջույքի էր այն ժամանակ, երբ իր տան շեմին սովից ու ցրտից մահանում էր Դավարոսը: Սա միակ հարցն է, որ պիտի տրվի քեզ. «Դու ունեցե՛լ ես մարդկային սիրտ, թե՛ սրտի փոխարեն քար է եղել կրծքիդ տակ»: Եթե ունեցել ես մարդկային սեր, ապա այն կարող է ծաղկել աստվածային սիրով, իսկ եթե չի եղել [այդ սերը], ապա ինչպես պետք է միանաս Աստծու սիրուն:

Եվ պետք չէ փախչել այդ դատաստանից՝ ասելով. «Ես սիրում եմ մարդկանց...»: Բոլոր մարդկանց, որոնք հեռու են մեզանից, մենք սիրում ենք: Գողմներից մեկն այսպես է բնութագրում իր հեղինակին. «Այդ մարդն այնպես էր սիրում մարդկությանը, որ ատում էր այն մարդուն, որը լիովին միանալ էր, քանի որ վերջինս ապականում էր մարդկության՝ իր աչքերում առկա կատարյալ պատկերը»: Ամիրական, գոյություն չունեցող մարդկությանը, այո, սիրում էր նա, բայց որոշակի մարդուն կամ մարդկությանը խմբին նա ատում էր: Իրական մարդկանց նա այլանդակություն էր համարում, իսկ ինքը երազում էր այն գեղեցկության մասին, որը չէր եղել, չկար ու երբեք չէր էլ լինի՝ մինչեւ երկրորդ գալուստը: Մարդկանց նկատմամբ մեր սերն արդյո՞ք այդպիսին չէ: Մենք սիրում ենք շատ քչերին, բայց անգամ միայն չենք կարողանում սիրել առանց հետին մտքի, առանց պայմանների: Մենք վիճում ենք միմյանց հետ, անտարբեր դառնում միմյանց նկատմամբ ու երես թեքում իրարից... Պողոս առաքյալն



ասում է. «Մեկը մյուսի դժվարությունները կրե՛ք ձեզ վրա, եւ այդպիսով դուք կկատարեք Քրիստոսի կամքը»: Այդ դժվարությունները ոչ միայն զրկանքներն են, այլ որեւէ մեկի վրա ծանրացած ամբողջ բեռը: Կարող ենք որոշ ժամանակ կարեկից լինել օտարի վշտին, կրել ոչ երկարատեւ հիվանդության, կարճատեւ վեճերի դժվարությունները, բայց ինչ սարսափելի է տեսնել, որ մարդու վիշտն անմխիթարելի է, հիվանդությունը չի նահանջում, չի վերանում չքավորությունը. կարճ ժամանակ անց (որից առաջ խղճում էինք այդ մարդուն, շրջապատում նրան ուշադրությամբ, հոգ տանում նրա մասին) դառնում ենք անտարբեր նրա նկատմամբ. «Սի՛րե՛ք չենք վերանալու նրա հիվանդությունը, կարիքն ու վիշտը: Արդեն եկել է նրա առողջանալու, սթափվելու, արթնանալու ժամանակը: Եվ մի՞թե իմ ողջ կյանքում նրան պետք է խնամեմ...»: Աստված, սակայն, այդպես չի վերաբերվում մեզ: Քանի դեռ մենք ապրում ենք, տասնամյակներ շարունակ Նա համբերում, սպասում, հույս է փայփայում: Նա մշտապես մեր կյանքի ողջ ընթացքում ամձամձրույթ փորձում է օգնել մեզ: Դժբախտությունն այն չէ, որ մենք շատերին չենք սիրում կամ ունակ չենք սիրելու բոլորին, եւ մեր սիրտը փոքր-ինչ նեղ է (ինչպես Պողոս առաքյալն է ասում՝ «...»):

Դժբախտությունն այն է, որ մենք այնքան ոչ ճիշտ, անհամբերատար, կոպիտ ու անմխիտ սիրով ենք սիրում անգամ մեզ, ում մասին ասում ենք, թե թանկ են մեզ համար: Որքան է անհրաժեշտ խորհել մեզ մասին, ովքեր շրջապատում են մեզ, եւ հարցնել ինքներս մեզ. «Ինչպիսի՞ սիրով եմ սիրում մեզ. երջանկորեն, թե՛ դժվարությամբ»: Չե՛ք որ կարող է պատահել եւ այնպես, որ մեր սերը ճնշի դիմացիին եւ նրա համար ոչ թե ազատություն, այլ ստրկություն լինի: Մարդուն ճնշում է այն զգացմունքը, որը մենք «սեր» ենք կոչում, քանի որ մենք կարծես իրենից լավ գիտենք, թե որն է նրա երջանկությունը, ինչ է նրան հարկավոր, որտեղ է նրա ուրախությունը. մենք խլում ենք նրանից ազատության, ստեղծագործելու ողջ բերկրանքը, չե՛ք որ ինքներս ենք կամենում կառավարել նրա կյանքն այնպես, որ նրա համար «ավելի լավ» լինի: Երբ խորհում ենք ապաշխարության մասին, միշտ պատկերացնում ենք մուգ կամ մոխրագույն մի պատկեր, վիշտ, դառնացած սիրտ, արցունքներ, ինչ-որ անխուսափելի տրտմություն մեզ ու մեզ պատկանող կյանքի համար, այն բանի համար, որ մեր անցյալն այդքան մութ ու անվայելուչ է եղել, անվայելուչ՝ Աստծու առջեւ: ➔ էջ 5

Հայաստանը պետք է խոսի...



Սերտ էր 20-րդ դարասկզբի հայ երկու մեծագույն անհատներին՝ Հովհաննես Թումանյանի եւ Զորավար Անդրանիկի համագործակցությունը հայրենիքի համար վտանգավոր մի ժամանակահատվածում: Իրենց ուսերին առնելով վիթխարի պատասխանատվություն՝ նրանք հանդես եկան ժողովրդին համախմբելու եւ վտանգված հայրենիքը պաշտպանելու նվիրական առաքելությամբ:

Հայոց պատմության բախտորոշ դարաշրջանը՝ 20-րդ դարի սկիզբը (1900-ից 1920 թվականն ընկած ժամանակահատվածը), լեցուն է ինչպես խիզախ ու հերոսական, այնպես եւ չարաբաստիկ ու ողբերգական բազում իրադարձություններով: Թվում է, թե այդ ժամանակահատվածն էր անկյունաքարային ու շրջադարձայինը, եւ մեր ժողովուրդը պետք է տեր դառնար իր բախտին՝ ազատությանն ու պետականությանը, կամ կորչեր ու կործանվեր աշխարհավեր եւ արյունալի իրադարձությունների հորձանուտում:

Բարեբախտություն է, որ այդ վճռորոշ դարաշրջանում հայ հասարակական-քաղաքական (եւ ոչ միայն) մտքի ասպարեզում կողք կողքի եւ ձեռք ձեռքի տված գործել են այնպիսի մեծանուն ու փառահեղ անհատներ, որպիսիք են Հովհաննես Թումանյանն ու Զորավար Անդրանիկը:

Այո, ամենայն հայոց բանաստեղծն ու ամենայն հայոց զորավարը միասնական, անհատում ջանքերի գնով փորձել են փրկել ավերակվող հայրենիքը եւ ցեղասպանությունից մազապուրծ եղած ժողովրդի վերջին բեկորները:

Ճշմարտություն է, որ Անդրանիկը, սրի հերոս ու ռազմի հերոս լինելուց զատ եւ այդ ամենին զուգահեռ, նաեւ խոսքի եւ ոգու մարդ էր, գրի եւ գրչության, մշակույթի մեծ նվիրյալ ու հովանավոր: Հայ ժողովրդին պատուհասած ճա-

կատագրական փորձությունները շարունակվում էին նաեւ 1917 ու 1918 թվականներին: Այո, հայությունն ու նրա հայրենիքը գտնվում էին ողբերգական կացության մեջ, բայց միաժամանակ ճակատագիրը հույսեր էր առկայծում ավերակված հայրենիքի վերածնության եւ անկախության վերականգնման համար:

Հովհաննես Թումանյանն ու Անդրանիկը միմյանց ծանոթ էին դեռ դարասկզբից, եւ այդ ծանոթությունը կայացել էր իջեւանցի անվանի հայդուկ սեւքարեցի Սաքոյի միջնորդությամբ՝ Լոռիում (տես Հր. Սիմոնյան, Անդրանիկի ժամանակը, գիրք Ա, Երևան, 1996, էջ 230): 1904 թ. Սասնո պատամբության ճնշումից հետո Անդրանիկը մի պահ հանգրվանեց Արեւելյան Հայաստանում, որից հետո մեկնեց Եվրոպա:

Հովհաննես Թումանյանի եւ Անդրանիկի մտերմությունը խորացավ ու վերածվեց կայուն բարեկամության հետագայում՝ 1916–1918 թթ., երբ նրանք նաեւ հաճախակի հանդիպելու առիթներ ու հնարավորություններ ունեին:

Հայտնի է, որ 1914 թ. Անդրանիկը ժամանեց Կովկաս եւ Թիֆլիսում հանդիպեց ռուսական պետական ու ռազմական գործիչների հետ, ապա գլխավորեց հայկական առաջին զույգը, որը կամավորական ամենախոշոր զորամասն էր: Կամավորական առաջին զույգը մարտական հոյակապ ուղի անցավ 1914 թ. աշմանային ու ձմեռային մարտերից մինչեւ 1915 թվականի փառահեղ հաղթանակները: 1915 թ. փետրվարին Անդրանիկը սաստիկ հողացավերի պատճառով կարճ ժամանակով եկավ Թիֆլիս՝ բուժվելու: Բայց ընդամենը տասն օր անց նա ստիպված էր վերադառնալ ռազմաճակատ: ➔ էջ 7

Բաֆֆու «Դավիթ Բեկ» պատմավեպը

← էջ 3

Հյուսնի, սափրիչի, սափրիչի աշակերտ վիրաբույժի երեւոյթով Դավիթ Բեկի մարդիկ ծայտայալ թափանցում են բերող: «Սափրիչը հալիժորդի տեր Ավետիքն էր, Դավիթ Բեկի ամենաքաջ զորապետներից մեկը» (էջ 316), նրա աշակերտը հայր խորեմն էր, հյուսնը՝ Ստեփանոս Շահումյանը: Ճանապարհին ոչնչացնում են մելիք Ֆրանգյուլից Ֆաթալի խանին նամակ տանող սուրհանդակին, տեղեկանում նամակի բովանդակությանը, որով դավաճանն օգնություն էր խնդրում Դավիթ Բեկի դէմ: Թափանցում են բերող, որտեղ կար նաեւ հայկական թաղամաս՝ մի հիսուն տուն: Բերդի տեր Ասլամազ-Կուլի խանը հայերին թույլ չի տալիս հեռանալ, պահում է որպէս պատանդ:

Այստեղ է նաեւ հալիժորդի Մելիք Փարսադանի որդի՝ չափազանց հմարագետ ու ճարպիկ Բալի զորավարը: Մի հայ ընտանիքում խորեմի եւ տանտիկնոջ՝ Սառայի սիրո վերհուշն է՝ դարձյալ ենթարկված հայրենիքին ծառայելու գաղափարին: Բերդի հայությանն առաջնորդում է տեր Ավետիքը եւ տանում դեպի թուրքի թաղ: Իր քաջագործություններով հաղթանակն ապահովում է նաեւ սպասուհի Փարիշանը, նա, ով հրդեհում է բերդը եւ ձեռք բերում թշնամու զինապահեստի բանալիները: Թուրքերը «Յա Ալի» են բռնակում ու նետում մարտի, հայերը՝ «Կեցցե՛ Դավիթ Բեկը»: Բերդում հրդեհներ, զինապահեստի գրավում, այլույլ հնարամտություններ... Հայերը կարողանում են թշնամուն սեղմել թէ՛ ներսից եւ թէ՛ դրսից ու ոչնչացնել: Թշնամին նաեւ ունեւորվում է՝ ոչ միայն ռազմավարն է, այլև սարերում արածող հոտերն են, նախիրներն ու երանակները... Մաքրվում են նաեւ թուրքներին վաշկատում ցեղերի մնացորդները: Բաֆֆին արդարացիորեն խիստ է թշնամու հանդեպ, որովհետեւ հոգեպես եւ մյուսապես նրանք կեղծել էին ժողովրդին, ոչ միայն սպանել հայրենասիրական ոգին, այլ նաեւ սնել, աճեցրել, բազմացրել դավաճանների: Այս հարցը հերթական անգամ քննարկման են ենթարկում սրբազանն ու Ասլամազ-Կուլի խանի վեգիորը եւ գթության ու անգթության հարցը հանգեցնում կրոնների բարոյախոսության տարբերություններին: Թե՛ն իմնա հայ քրիստոնյաները գիտակցել են, որ գուցե այդ գազանների համար չէ, բայց Բեկը, անսալով վեգիորի աղաչանքներին, ասում է. «Ես կիրամայեն դադարեցնել կոտորածը, բայց բերդը պետք է քանդվի» (էջ 449):



Նորից փայլատակում են հարեմի գեղեցկուհիները. այստեղ եւ սիրո հարցեր են, եւ խորամանկություններ են ու խարդավանքներ: Ասլամազ-Կուլի խանին բացատրում են փոխադարձ սիրո հմայքն ընդդէմ բազմակնության, որ նշանակում է «Կինը բողոքում էր բռնության դէմ» (էջ 389): խանը մի կերպ փախչում է Բեկի ազատարարներից, բայց ուշքունիտը կանանցի կողմն է: Գիտակցում է, որ կանանցն իր արժանապատվությունն է: Գերի չընկնելու խամար խանն իջնում է իր իմացած գաղտնի ծակուղներից մեկի մեջ եւ իր հետ մեկտեղ պայթեցնում կանանցը:

Դեռ կար մելիք Ֆրանգյուլը, որ երիցվանիկ ավանում էր: Ասում էին նաեւ Արծվանիկի մելիք Ֆրանգյուլ: Դավիթ Բեկի համբավը նրան համոզեց չէր տալիս: Ֆաթալի խանից Բարգուշատի մելիքությունն ստանալուց հետո նրա հետ կապն ամուր պահելու համար աղջկան կնության է տալիս նրա եղբորը՝ Աղասի խանին: Դրանից հետո Ֆաթալի խանի մոտ մելիք Ֆրանգյուլն ստանում է վեգիորի պաշտոնը:

Ֆաթալի խանի, նրա հետ մեկտեղ նաեւ մելիք Ֆրանգյուլի դէմ գնում է զորավար Թորոսը. վերջինիս հետ էին Ստեփանոս Շահումյանն ու Բալի զորապետը: Բաֆֆին դավաճան մելիքի մասին նույնիսկ այսպիսի խոսքեր է գրում. «Մելիքը բնա-

վորությամբ բարի մարդ էր, բայց սաստիկ փառասեր: ...իբրեւ հայ, նա ցանկանում էր Հայաստանի բարին, ցանկանում էր, որ այդ երկիրը ազատ լինի, բախտավոր լինի, ցանկանում էր, որ նա ունենար իր հայ իշխողը, բայց այդ իշխողը լինի ոչ այլ ոք, բայց՝ միայն ինքը» (էջ 455): Նա ուրացել էր հավատը, բայց ոչ մահմեդական էր, ոչ քրիստոնյա, նրա իրական հավատը մերկ շահն էր ու փառքը: Ներկայացնում է մելիքի ընտանիքը. կինը մահացավ այն տարի, երբ նա մահմեդականություն ընդունեց, հետո չի ամուսնանում, ունի երկու տղա՝ Հախիմ, որ հորից առանձին ընտանիքով ապրում է գյուղում, եւ Սկրտումը, որն ապրում է հոր հետ: Երկու որդիներն էլ պահել են քրիստոնեական հավատը:

Հետաքրքրական է մի նրբություն՝ խաները կնասեր են, իսկ մելիքների կյանքում, այն էլ մահմեդականություն ընդունած մելիքների, որ բազմակնության հնարավորություն է, կին ասածը եղած-չեղած՝ նույն բանն է: Այստեղից՝ մելիքների արժանապատվության պակասը, որովհետեւ կնոջ ներկայությունը նաեւ կնոջ պատիվը պահելու արվեստ է:

Դավիթ Բեկի ուժն ու ռազմական հաջողությունները տեսնելով՝ մելիք Ֆրանգյուլն անգամ մտածում է անցնել նրա կողմը:

Տատանումների ու տվայտանքների մեջ վիճակ է գցում, որը դուրս է գալիս հոգուտ Ֆաթալի խանի: Իր հերոսի մեջ դրական հատկանիշներ նշելն ահա նրա այս տատանումների համար էր, ըստ որի՝ նա կարող էր նաեւ Դավիթ Բեկի զինակիցը լինել, եւ այդ դեպքում ոչ մի պարսիկ կամ թուրք վտանգ չէին ներկայացնի: Բայց ահա վիճակը դուրս է գալիս Ֆաթալի խանի օգտին:

Վերջինս այդ ժամանակ իր կանանցով ապրում էր ամառանոցում, ինչն Արծվանիկից մեկ ժամվա ճանապարհի վրա էր: Մելիք Ֆրանգյուլն այցելում է նրան եւ նախագծում առաջիկա իրադարձությունների պլանը: Այստեղ է, որ նա խորամանկության հմարամտությամբ գերազանցում է ինքն իրեն: Բավական չէ, որ «տերտերով, ավետարանով» հավատարմության թուղթ է ուղարկում Թորոս իշխանին, այլեւ ինքն է ներկայանում իր ախոյանին, երդումներ տալիս, հայտնում իր «հպատակության հավաստիքը» (էջ 482), խոստանում իր 2000-անոց զորախմբով օգնել նրան ընդդէմ Ֆաթալի խանի: Իր կեղծիքը թե՛ նամակում, թե՛ անձնական հանդիպման ժամանակ եւ թե՛ Ֆաթալի խանի հետ ունեցած հարաբերություններով ոչ միայն երդումներով, այլ նաեւ ցուցադրականորեն այնպես է կազմակերպում, որ հավատան: Հավատ ներշնչելու համար կազմակերպում է անգամ խանի զորքերի ձեւական հարձակումն իր ամրոցի վրա, որտեղից ինքը, իբր, մի կերպ է ճողոպրում: Այս ամենը փոխում են Թորոս իշխանի վերաբերմունքը մելիք Ֆրանգյուլի հանդեպ, եւ նրան թույլ է տալիս, որ գործով ապացուցի իր անկեղծ նվիրվածությունը: Թե՛ն յուրայիններից մյուսներն ամենեւին չեն հավատում մելիքի փոխակերպմանը, բայց իշխան Թորոսի մեջ միամիտ մարդկային անհարկի գլուխ է բարձրացնում: Մինչդեռ դավաճանը մնում է դավաճան. կռվի թունդ պահին, երբ նախնական պայմանավորվածության համաձայն՝ պարսից զորքը մահանջում է, իսկ հայերը հետապնդում են նրանց, ահա այդ իրավիճակում հայերն ընկնում են շրջափակման մեջ. պարսից բանակը հետ է դառնում եւ անցնում հակահարձակման, մյուս գլխից հայերի դեմ հարձակման է անցնում մելիք Ֆրանգյուլը:

Շարունակելի

Դավիթ ԳԱՄԱՐՅԱՆ

Բանասիրական գիտ. դոկտոր, պրոֆեսոր Արվեստի վաստակավոր գործիչ

ԱՊԱՇԽԱՐՈՒԹՅԱՆ ԲԵՐԿՐԱՆՔԸ

← էջ 4

Բայց դա ապաշխարության մի կողմն է միայն, կամ ավելի ճիշտ՝ այն պետք է լինի գեթ մեկ ակնթարթ: Ապաշխարությունը պետք է զարդարվի ուրախությամբ ու սիրանքով, առանց որոնց անպատու է: Եվ այն, ինչը պետք է ապաշխարանք լինե, վերածվում է մի անպատու զղջման, որը եւ սպանում է մարդու կենսաուժը՝ նրան հուզելու եւ նորոգելու փոխարեն: Երբ ինքներս մեր, Ավետարանի, աստվածային ուղու մասին խորհրդածելու արդյունքում, մեր վերին կոչմանն անհավատարիմ՝ կանգնում ենք մեր մեղքերին դեմ հանդիման, մեր սրտում, անշուշտ, ճնշող ցավ, ամոթ են առաջանում: Խոր հիասթափություն այն պատճառով, որ այդքան հեռու ենք այն ամենից, ինչպիսին կարող էինք լինել, այնքան տարբեր ենք այն [պատկերից], որը խորհեց Աստված մեզ արարելիս: Սակայն դա պետք է միայն ուղղորդի մեզ նոր կյանքով ապրելու: Այո, անհրաժեշտ է դադարել նախկին կյանքով ապրելուց, հայացքը համառորեն սեւեռել մեր կյանքի մութ կողմերին, մեր մտքերին, սրտի խորհուրդներին, մեր ցանկություններին, արարքներին ու վերաբերմունքին: Պետք է զննել խիստ ու սթափ հայացքով այնպես, ինչպես բժիշկն է զննում հիվանդին, կամ ինչպես մենք ենք գիշերը քայլելիս զննում ճանապարհը, որպեսզի չնույրվենք, չընկնենք: Պետք է ուշադրություն դարձնել այն ամենին, ինչը տեսանելի է, եւ արդարամտորեն անդրադառնալ ամեն ինչին. պետք է մինչեւ վերջ ընդունել ամոթը, ցավը եւ չփնտրել արդարացումներ՝ ցավը մեղմելու, ամոթից չայրվելու համար: Միայն մեր ողջ ուժով, կարելով չափով սեփական ամոթը վերապրելով՝ կարելի է ազատվել ամենից, ինչից որ կախված է այն: Եթե միայն փորձենք որեւէ չափով, անգամ փոքր-ինչ մեղմացնել մեր մեղավորության իրողությունը, առավել ընդունելի դարձնել

մեր մեղքը (ինչպես այնքան, երբ ասում ենք ինքներս մեր մասին՝ «Մեղավոր են, ինչպես ամենքը», կամ «Իսկ ուրիշ ինչպե՞ս կարող էի վարվել»), եթե միայն փորձենք խլացնել այդ ցավը, ապա ապաշխարանքն անհնարին կդառնա մեզ համար: Քանի որ միայն սարսափի, մեղքի մահացու ուժի գիտակցումով եւ ինքներս մեզ, ոչ թե ուրիշներին կամ Աստծուն անարժան լինելու պատճառով ունեցած ամոթով կարող ենք այդ գերությունից ազատվելու ուժ գտնել: Քանի դեռ «կրում ենք» այդ գերությունը, մնում ենք դրա մեջ: Սա է տարբերությունը մեր եւ այն սրբերի, որոնց վարքի մասին ընթերցում ենք՝ սկսած առաքյալներից, վերջացրած հավատքի ժամանակակից հետեւորդներով: Նրանք կարողացան մինչեւ վերջ խմել սեփական ամոթի բաժակը եւ մաքրեցին իրենց սիրտն ու գիտակցությունը, վերացրին իրենց ողջ էությունը տանջող սուր ցավը, որը վկայում էր, թե ով են իրենք: Բայց երբ տեղի ունենա այդ ամենը, պետք չէ ոչ հուսահատության մեջ ընկնել, ոչ կանգ առնել այդտեղ: Հիշե՛ք, թե ինչ է պատմում մեզ Ավետարանը. ինչպես էր Պետրոս առաքյալը պարծենում, որ անգամ մահվան կգնա Փրկչի հետ, որեւէ մեկը չի բաժանի իրեն Քրիստոսից: Իսկ այն բանից հետո, երբ Փրկչին բանտարկեցին եւ անօրեն դատ կազմակերպեցին, Պետրոսին մոտեցավ երիտասարդ աղախինը, որը չէր կարող նրան որեւէ կերպ վնասել՝ բացի խոսքից, եւ հարցրեց՝ արդյոք Պետրոսն էլ չի եղել Հիսուս Նազովրեցու հետ: Եվ Պետրոսը երեք անգամ ուրացավ Տիրոջը: Եվ դուրս եկավ ու շրջվելով՝ հանդիպեց Հիսուսի հայացքին եւ դառնապես լաց եղավ:

Շարունակելի

Ռուսերենից թարգմանությունը՝
Գեորգ ԵՐԿ. ԿԱՐԱՊԵՏՅԱՆԻ
ԱՆՆԱ ՀՈՎԷԹՅԱՆԻ



Կիսվեց շոգ օգոստոսը: Շոգը ուն՝ ուն, բայց այն բնության հիանալի պարզեւն է խաղողի ջերմասեր վազի համար:

Արեւի, հողի, ջրի եւ այգեպան մարդու արարող ձեռքերի դաշնությամբ՝ զառ ու զմրուխտ այգիներում գոհար ողկույզը օրավուր հասնում, ոսկեշող հատիկները քաղցրորեն լցվում են արեւահյութով, բարձր, փքուն հողաթմբերի վրա բազկատարած վազերն էլ բերքով ծանրանում, խոնարհվում են:

Օգոստոսյան արգասավոր այս օրերին է Հայաստանյայց Առաքելական հնավանդ եկեղեցին պատշաճ արարողակարգով նշել Ս. Աստվածածնի Վերափոխման տոնը, կատարել խաղողօրհներհ կարգը: Թեպետեւ անաստվածություն քարոզող խորհրդային կարգերը 1920–1930-ական թվականներին գործող շատ եկեղեցիներ փակեցին, սակայն Օշականի՝ հայոց սքանչելի եւ ազգապահ գրերն ստեղծող մեր մեծագույն երախտավոր Մեսրոպ Մաշտոցի սուրբ նշխարներն ամփոփող եկեղեցին այն սակավներից էր, որ գործեց մշտաբար:

....Այսօր՝ դեռ վաղ առավոտից, եկեղեցու զանգերի ղողանջները քաղցրալուր ելեւեջումներով թեւածում են Օշականի եւ շրջակա շենքերի, հուռթի այգիների, հանդ ու անդաստանի վրա, անուշորեն լցվում օւռախնները, անցնում սրտեսիրտ ու բոլորին հրավիրում Վերափոխումն Սուրբ Աստվածածնի տաղավար տոնի Ս. Պատարագին:

Տոնական վառ հագուկապով ուխտավորների հոծ հարահուսը եկեղեցի է տանում: Տիրամորը նվիրված հնագույն, ժողովրդին սրտամոտ արարչախորհուրդ սույն տոնը հայության քանի-քանի սերունդ է վայելել վսեմական մի առանձնակի սիրով: Հիրավի՝ ժողովրդական տոնատոնախմբություն: Բոլորն էլ ուրախ են՝ խնդումներես: Շատերի ձեռքերին լի սկուտեղներով ու զամբյուղներով մորախա ալվան խաղող է: Ավանդապահ այգեպանները խաղողօրհնության ծիսակարգից հետո միայն կճաշակեն իրենց քրտնաշարչար աշխատանքի անուշ պտուղը...



Զմրուխտ վազերի սգերգը

....Ոսկեվազից շարվեշարան Օշական ձգվող հավատացյալների քարավանում են նաեւ Գեղամ Սարգսյանը, նրա մանկամարդ կինը, երկու ժիր մանկիկները: Ուռենու դալար շիվերից գործած զամբյուղով նրանք վաղախա «Խալիլի», «Նազելի» եւ «Քիշմիշ» տեսակի խաղող են տանում եկեղեցի՝ օրհնելու: Ճանապարհին քաղցրավենիք, փուչիկ, սուլիչ, սարի ծամոն ու պես-պես ինչ-որ բաներ ցանկացած փոքրիկների հայրը սիրով զնեց մանրուք վաճառող չարչիներից՝ ավելի ուրախացնելով սիրասուն բալիկներին:

Օդը հագեցած է մարդկանց աշխույժ խոսք ու գրույցի, զվարթ ծիծաղի, երեխաների կայտառ ճիչերի, շվիների բազմաձայներով, իսկ բարձրում մով երկնքում, մազով ճախրում են ճերմակաթեւ աղավմիները:

Ուխտավորների ուրախ քարավանը եկեղեցի հասավ, ուր գավիթում եւ ընդարձակ բակում հավատացյալները հազարավոր

են: Երկար սպասված ցանկալի օր: Ուխտավայրում այսօր ծաղկահասակ, սիրավառ տղաների ու աղջիկների ինչքան մոր ծանոթություններ կլինեն...

Իշխան Վահան Ամատունու հնօրյա շիրմակոթողի շուրջ վառվում երիտասարդների մի կատարյալ աստղաբույլ է հավաքվել՝ շատերն արծաթյա մախշազարդ գոտի կապած, ազգային փողփողուն տարազներով: Գեղամի ընկերներն են նրանք, աչք էին պահում նրա գալուն, որպեսզի շուտով արարողակարգերի ավարտին պես, բակում զովմդ բռնեն, եւ պարախումբը դարձյալ առաջնորդի իրենց «շենք ու շնորհքով զանգրահեր ախպեր-տղան»:

— Տղերք ջան, մերող եղեք, էսօր... Հեն պարի,— որքան հնարավոր է անհոգ ձեւանալով՝ ասաց Գեղամն ու հեռացավ՝ առանց որեւէ բացատրության:

Նա, իրոք, պարելու սիրտ չունեւր. վիշտ կա նրա սեւակնած սրտում, օրհնելու բե-

րած խաղողն էլ իր այգունը չէ, դրկիցից է խնդրել...

Արեւածագից առաջ Գեղամը զամբյուղը ձեռքին այգի իջավ՝ եկեղեցում օրհնելու համար խաղող ընտրելու: Սակայն, ի ցավ սրտի, տեւական ծարավից պապական այգուց գեթ մեկ, գոնե մեկ ճուր չպոկեց. ընտիրը չգտավ, չկար... Սակավահյութ, մանրահատիկ ողկույզները դալուկ ու ցամաք չանչեր լինեին ասես: Ջրապապակ այգու խոտերին անգամ Աստծու տված առավուտ վա շաղն էլ չէր իջել: Տեսնելու բան չէ՝ չորուտ դարձած հողը շոգից տեղ-տեղ այնպիսի լայն ու խոր ճաքեր է տվել, ուր կոտրակի ջրխմիկ բաց արմատներին մարդու դաստակն էլ կհասնի: Թեեւ վերջին ոռոգմանը հաստիկ թմբերն իրենց սրտուտ հողե ծոցում, որ, ինչպես օազիսի աղբյուրից անապատի ծարավ ուղտն իր սապատի հյուսվածքներում, լի ու բոլ խոնավորություն էին ամբարել, վաղուց արդեն ջրագրկվել են խապառ:

Իսկ ահա սահմանակից հարեւանների՝ ժամանակին ջրված այգիներում հյութառատ, եղեմական հակիմբ ողկույզների հատիկների մեջ արեւի շողն է ցուլցում, բեկբեկվում ծիածնափայլ...

...Մեղվաջան, ժրաժիր, հրաշալի այգեպան է Գեղամը: Վաղ գարունքվա այգեբացից սկսած մարդը ոսկու ամագ-քրտինք թափեց այգու վրա՝ էտեց-հատեց որթատունկի մատերը, մոր անդալիսներ քաշեց, փորեց-փխրեցրեց հողը, բուժեց ու խչմարներով հեմակավորեց բերքաբեր վազերը եւ էլի շատ-շատ գործեր: Օրն ի բուն՝ արեւածագից մինչեւ մայրամուտ, կորովի այգեպանի նրա գլխի ճերմակ թասակը պիտի հարատես շարժվեր գմրուխտ վազերի անդաստանում: Եթե կապոցում մնացել է ճաշի հացից, կուլայում էլ սառը ջուր ունի, նա ինքնամոռաց կբանի մինչեւ մթնշաղի թանձրանալը: Ու դեռ ափսոսում է՝ «օրը էս ինչ շուտ մթնեց»:

Ընտանիքն է նրա սրտի սերը, այգին՝ հոգու երգը, բոլորանվեր աշխատանքը՝ վասն խաղողի ու գինու... ➔ Էջ 8

✦ ՀԵՏԱԶԻՐԷՐ ՓԱՍՏԵՐ

Աստվածաշնչյան բույսեր

Աստվածաշունչ մատյանը տարաբնույթ վկայությունների եւ հիշատակությունների մի անսպառ շտեմարան է. այն կյանքի բոլոր ոլորտներին վերաբերող գիտելիքներ է հաղորդում:

Ուշագրավ է, որ Սուրբ Գրքում անգամ հիշատակություններ կան տարատեսակ ծառերի եւ բույսերի վերաբերյալ: Դեռեւս Շենոթոց գրքում Արարիչն ասում է. *«Ահա ձեզ տվեցի ողջ երկրի վրա տարածված սերմանելի բոլոր բույսերի սերմերը եւ իրենց մեջ պտուղ սերմանելու սերմ պարունակող բոլոր ծառերը: Դրանք թող ձեզ համար սնունդ լինեն...»* (Ա 29):

Նույն գրքում՝ մեկ այլ դրվագում, նկարագրվում է, որ Ադամի ու Եվայի անհնազանդությունից եւ մեղանշումից հետո, Աստծու խոսքի համաձայն, երկիրը փուշ ու տատասկ պետք է աճեցներ մախածոողների համար, եւ նրանք պետք է սնվեին դաշտային բույսերով (հմտ. Շենոթ. Գ 18):

Համաշխարհային ջրհեղեղի պատումը ներկայացնող հինկտակարանյան հատվածում հիշատակվում է ձիթենու շյուղը. աղավմին Նոյի մոտ՝ տապան է վերադառնում երեկոյան՝ կտուցին ձիթենու մի շյուղ (Շենոթ. Ը 11):

Ելից գրքում հիշատակվում է անկեզ մորենին: Այսպես՝ Աստվածաշունչ մատյանը վկայում է, որ Աստված Ինքն ընտրեց Մովսեսին՝ նրա միջոցով Եգիպտոսի փարավոնին Իր կամքը հայտնելու եւ խրախուսելու զերթությունից ազատագրելու համար: Համաձայն Ելից գրքի՝ Մովսեսը հովվություն էր անում եւ արածեցնում էր իր աներոջ՝ Հոթերի՝ մադիանացիների քրմի ոչխարները. երբ նա ոչխարները տանում է անապատ ու հասնում Աստծու լեռ՝ Քորբե (կամ Սինայի լեռ), «Տիրոջ հրեշտակը երեւաց նրան մորենու միջից կրակի բոցով: Մովսեսը տեսնում էր, որ մորենին հրով վառվում

էր, բայց չէր այրվում: Մովսեսն ինքն իրեն ասաց. «Գնամ տեսնեմ այս մեծ տեսարանը: Ինչպե՞ս է, որ մորենին չի այրվում»: Երբ Տերը նկատեց, որ Մովսեսը տեսնելու համար մոտ է գնում, մորենու միջից ձայն տվեց նրան ու ասաց. «Մովսես, Մովսես»: Սա ասաց. «Ինչ է»: Աստված ասաց. «Մի մոտեցիր այստեղ: Կոշիկներդ հանի՛ր քո ոտքերից, որովհետեւ այն վայրը, ուր կանգնած ես դու, սուրբ հող է» (Գ 1–5): Եկեղեցական մատենագրության մեջ այս դրվագի վերաբերյալ պահպանվել են տարաբնույթ մեկնություններ, որոնց կանոնադառնաճք առանձին հոդվածով:

Հովման մարգարեի գրքում ասվում է. *«Եվ Աստված հրամայեց դոմենում, որը բարձրացավ Հովմանի գլխի վրա՝ նրան հովանի դառնալու, զովացնելու նրան եւ ազատելու իր տանջանքներից: Հովմանը չափից շատ ուրախացավ դոմենու համար»* (Դ 6): Այս վկայությունը թերեւս կարող է խիստ տարօրինակ թվալ, սակայն խոսքն իրապես բույսի որոշակի՝ դոմենի կոշվող տեսակի մասին է:

Դոմենին (Ricinus communis) արագ աճող բույս է եւ պատկանում է կաղանջանի կամ իշկաթնուկի ընտանիքին (Euphorbiaceae): Այս տեսակի բույսերը հիմնականում աճում են արեւադարձային գոտում. դրանց բարձրությունը գրեթե 13 մ է: Դոմենու տերեւի լայնությունը կարող է հասնել մինչեւ 1 մ-ի: Այս բույսի պտուղներից, որոնք արտաքինից ծածկված են փշերով, ստանում են բժշկության մեջ եւ արտադրական մպատակներով օգտագործվող յուղ (հայտնի է որպես «գերչակի յուղ»):

Առավել ուշ շրջանում մի շատ գեղեցիկ ծառատեսակ անվանվում է «հուդայաճառ». այս իրողությունը, բնականաբար, առնչվում է նորկտակարանյան հայտնի դրվագին:

Հուդայաճառը (Cercis) գարնանը՝ ծաղ-



կած ժամանակ, մանուշակագույն փաթեթած ծաղկեփունջ է հիշեցնում, տարածում է քաղցր բույր, ունի սրտաձեւ տերեւներ: Հայտնի է նաեւ «արծվան», «ցերցիս», «ծառ Հուդայի երկրից» անվանումներով: Պահպանված ավանդության համաձայն՝ Հուդան մատնությունից հետո իենց այս ծառի ճյուղից է կախվել: Աստվածաշնչում բույսը հաճախ այլաբանորեն խորհրդանշում է մարդուն (տես Սաղմ. ՂԱ 13–16): *«Նրանց որդիները մոր տունկի պես հաստատված են իրենց մանկությունից...»* (Սաղմ. ՃեԳ 12), Եսայի մարգարեի գրքում էլ ասվում է. *«Եվ նրանք պիտի կոշվեն ազգ արդարության, տունկի փառս Տիրոջ...»* (ԿԼ 3):

Սուրբ Գրքում «բույս» կամ «տունկ» բառերը գործածվել են նաեւ որեւէ մեկի ավանդած ուսմունքը, վարդապետությունը կամ հաստատած օրենքներն ու սովորույթները

խորհրդանշելու իմաստով. *«Քանի որ դու թողեցիր քո փրկիչ Աստծուն եւ չհիշեցիր Տիրոջը՝ քո օգնականին, դրա համար էլ անհավատ տունկ եւ անհավատ սերմ պիտի տնկես...»* (Ես. Ժ 10): Այս իմաստով է նաեւ Մատթեոսի Ավետարանում ասվում. *«Ամեն տունկ, որ իմ երկնավոր Հայրը չի տնկել, արմատախիլ պիտի արվի: Թողե՛ք նրանց. կույրեր են, կույրերի առաջնորդ. երբ կույրն է առաջնորդում կույրին, սխալվում է, եւ երկուսն էլ փոսն են ընկնում»* (Ժ Ժ 3–14):

Նոր Ուխտում՝ Քրիստոսի առակներում, հաճախ է հիշատակվում այս կամ այն բուսատեսակը. այսպես՝ Մարկոսի (ԺԳ 24–30) Ավետարանում խոսվում է որոմների, իսկ Դ 30–34-ում եւ Դուկասի (ԺԳ 18–21) Ավետարանում՝ մանանեխի հատիկի մասին:

Հայաստանը պետք է խոսի...

← էջ 4

1915 թ. փետրվարի 20-ին Անդրանիկի՝ ճակատ մեկնելու կապակցությամբ ողջերթի միջոցառում տեղի ունեցավ Թիֆլիսում, որտեղ ջերմաշունչ խոսքով հանդես եկավ Հովհաննես Թումանյանը։ Նա հաղթանակ ու քաջություն մաղթեց հայ կամավորներին, իսկ Անդրանիկին անվանեց «Հայոց աշխարհին ազատություն բերող Գարիբալդի» (Հ. Ավագյան, Չորավար Անդրանիկ եւ Հովհաննես Թումանյան, Երևան, 2004, էջ 13)։

Հովհաննես Թումանյանի իմաստունությամբ դրոշմված վերոնշյալ բնութագրումը ճիշտ է եւ համապատասխանում է պատմական իրողություններին։ Նույնիսկ կարելի է պնդել, որ Անդրանիկը մեզ համար շատ ավելին էր, քան Գարիբալդին՝ Իտալիայի համար։ 1916 թ. մարտին Անդրանիկը կրկին Թիֆլիսում էր, որտեղ պիտի մաքառեր արեւմտահայ հազարավոր փախստականների տեղավորման ու ապահովության խնդիրների լուծման համար։ Արեւմտահայ գաղթականների հոսքը Վրաստանի ապագա մայրաքաղաք, սոցիալական տագնապներից բացի, ստեղծել էր նաեւ քաղաքական առումով լարված իրավիճակ։ Վրացական շրջաններում սկսել էին կեղծ լուրեր տարածել, թե հայերը նախապատրաստվում են Անդրանիկի գլխավորությամբ հարձակվել վրացիների վրա եւ տիրանալ Թիֆլիսին։ Այս տրամադրությունները կանխելու եւ ճշմարտությունը տեղ հասցնելու նպատակով Հովհաննես Թումանյանը մամուլում հանդես եկավ «Ինչ եմ ասում» հոդվածով, որում խստորեն դատապարտում էր նման քարոզչություն անողներին։ Բանաստեղծը հիմնավորում է, որ այդ կարգի լուրեր տարածողները սադրիչներ են, որոնք ձգտում են խաթարել հայ եւ վրաց ժողովուրդների բարեկամական հարաբերությունները։ Հովհաննես Թումանյանը, վրացիներին դիմելով, ասում է, որ Անդրանիկը ոչ միայն նրանց հակառակ գործելու նպատակներ չունի, այլեւ «.....եթե խումբ կազմելու լինի, ոչ թե ձեր դեմ գալու համար կկազմի, այլ ձեզի օգնելու, եթե երբեք չեք դուրս եկել ինչպես մեր ժողովուրդը է.....» (Հովհ. Թումանյան, Երկերի ժողովածու, հտ. VI, Երևան, 1959, էջ 224)։

Վերոհիշյալ հոդվածում Հովհաննես Թումանյանը ներկայացնում է Անդրանիկին իր մարդկային, ազգային ու քաղաքացիական լավագույն գծերով ու հատկություններով։ Նա մեջբերում է Չորավարի հետեւյալ հայտնի խոսքը. «Երբ իրիկունը գլուխներդ բարձին կոնք, որ քնանաք, մի քիչ մտածեցե՛ք ձեր ազգի մասին։ Այնուհետեւ մտածեցե՛ք ձեր հարեւանի մասին՝ հայ լինի նա, թուրք լինի, վրացի լինի, ով կուզե լինի, եւ բարի մտածեցե՛ք» (անդ, էջ 225)։

Հովհաննես Թումանյանի ու Անդրանիկի ճանապարհները հատվեցին ճակատագրական 1917 թվականին, երբ նրանք երկու անգամ համախորհուրդ ուղերձներով հանդես եկան հայոց հայրենիքի համար ծանր ու ճակատագրական պահերին։

Առաջինը կապված է «Հայաստան» համահայկական պարբերականի հիմնադրության հետ։ Առաջին աշխարհամարտի եւ Հայոց ցեղասպանության հետեւանքով



նոր՝ անմախաղեպ իրավիճակ էր առաջացել։ Մեծ եղեռնից մազապուրծ հարյուր հազարավոր գաղթականներ էին դեգերում Արեւելյան Հայաստանի ու Ռուսաստանի բազմաթիվ բնակավայրերում։ Վերոնշյալ գաղթականների, որբերի հոգսերի, Արեւմտյան Հայաստանի ազատագրման հիմնահարցերի արծարծման համար Չորավար Անդրանիկը որոշեց ստեղծել նոր պարբերական, եւ այս ծրագիրը հնարավոր էր կյանքի կոչել իր հավատարիմ բարեկամի՝ Հովհաննես Թումանյանի աջակցությամբ։

Եվ ամենայն հայոց զորավարի, եւ ամենայն հայոց բանաստեղծի ջանքերով ապարեզ եկավ «Հայաստան» օրաթերթը, որը պիտի դառնար հայ դատի խոսափողը։ Անդրանիկ համարում կողք կողքի գետեղված էին Հովհաննես Թումանյանի եւ Չորավար Անդրանիկի ուղեւշային հրապարակումները։ Այդ օրվանից արդեն անցել է մեկ դարից ավելի ժամանակ, սակայն վերոնշյալ հոդվածները չեն կորցրել իրենց հրատապությունն ու արդիականությունը։

«Հայաստանը պետք է խոսի»,— այսպես էր վերնագրված Հովհաննես Թումանյանի նյութը, որում նա նշում է, թե Հայաստանի եւ Հայկական հարցի շուրջն ինչքան ասես չեն կատարվել, սակայն «.....Հայաստանը գրեթե միշտ լռության է եղել դատապարտված ակամա։ Ոչ նրա ցավն ենք կարողացել ճշմարիտ իմանալ, ոչ էլ ցանկությունը։ Հայաստանը պետք է խոսի վերջապես.....» («Հայաստան», Թիֆլիս, 16 ապրիլի 1917)։

Նույնքան խորիմաստ ու ծրագրային էր Անդրանիկի ստորագրությամբ հոդվածը («Հայրենիքի վերաշինությունը»), որտեղ հստակ ու վճռական նշված է. «Մեր արեւան հարցը արդեն դրուած է ազատութեան եւ համաշխարհային խաղաղութեան համար պատերազմող պետութեանց դիւանագիտական սեղանի վրայ.... Արեւան հարցի հետ եւ այնքան խոշոր՝ դրուած է մեր ժողովրդի առջեւ եւ վերաշինութեան հարցը, որում պետք է լծուին մեր բոլոր ուժերը։ Վերաշինութեան ծանրութեան տակ է, որ մենք բոլորս հաւաքականօրէն պետք է մեր ուսերը

տանք եւ որում մէջ ոչ ոք պետք է ինքզինքը դուրս հաշուէ» (անդ)։ Ահա այսպես սկսեց իր առաքելությունը «Հայաստան» պարբերականը։ «Հայաստանը» խոսեց ժամանակի երկու ամենամշանավոր անհատների շուրթերով եւ գործողությունների ծրագիր առաջարկեց։

Հովհաննես Թումանյանն ու Անդրանիկը համայն հայության առջեւ հանդես եկան եւս մեկ անգամ նույն՝ 1917 թվականի վերջերին, երբ արդեն զգացվում էր թուրքական մոտալուտ արշավանքի շունչը։ Այդ օրերին Անդրանիկն ամեն ինչ անում էր, որ շուտափույթ կազմավորվեն հայկական կանոնավոր զինված ուժերը եւ շտապ մեկնեն ռազմաճակատ։

1917 թ. դեկտեմբերի 22-ին «Հայաստան» օրաթերթում հրապարակվեց Անդրանիկի որքան խորիմաստ, նույնքան հուզախոռվ կոչը, որում ժողովրդական բոլոր ուժերին հորդորում էր պաշտպան կանգնել հայոց հայրենիքին. «Պաշտպանե՛ք, չթողնե՛ք, որ օսմանեան բանակը, օգտուելով պատեհութենէն, գրոհ տայ մեր վաղուայ մեծ շեմքի վրայ» (անդ, 22 դեկտեմբերի 1917)։

Չորավարի խորին համոզումով՝ «Մեր ժողովուրդը կամ կապրի իր վերջին օրերը եւ կամ կգտնուի վաղուան ազատութեան մախօրեակին.... Հասած է ժամը վերջին մարտնչումին։ Գալիք ազատութիւնը կպատկանի բոլորիս.....» (անդ)։

Չորավարի կոչը գերհուզական լիցքերով բաղադրիչներ ունէր, ինչը պետք է ոգեշնչեր հայ հասարակության լայն շերտերին։ Ահա վերոնշյալ կոչի ամենաոգեշունչ հատվածը. «Եթէ հաւաքական կերպով չպատասխանես այս կոչին, եթէ պայծառ գիտակցականութիւն չունենաս հայրենիքի եւ փախստական ժողովրդի, բզկտուած մայրերու, բռնաբարուած հայ կոյսերու ներկայ սարսափելի կացութեան, եթէ դուն հասկացողութիւն չունենաս ստեղծուած ծանր րոպէի, այնժամ յետ առ ինձմէ հերոս անունը, զոր դուն ես սուած, եւ իրաւունք մի՛ ունենար իմ վրայ արտասուելու» (անդ)։

Չորավարը բարոյական իրավունքը վաստակել էր այսպես՝ այս ոգով ու ոճով պահանջելու իր ժողովրդից. «Հասկացութեան, տրամաբանութեան, գործի եւ գործելակերպի ազգային մեկ ճակատ — ահա հրամայականը, ահա վերջին խօսքը» (անդ)։

Չորավարի սույն կոչ-հորդորանքին անմիջապես արձագանքում է ամենայն հայոց բանաստեղծը։ Մեկ օր անց՝ 1917 թ. դեկտեմբերի 23-ին, տպագրվում է նրա մամակ-արձագանքը՝ ուղղված Անդրանիկին, որում նշում է, որ ահավոր վտանգի առջեւ յուրաքանչյուր մարդ պետք է ընդհանուրի սեղանին բերի ինչ որ ունի եւ կարող է՝ թե՛ վերահաս վտանգը կանխելու եւ թե՛ բաղձալի խաղաղությանը հասնելու համար։ Բանաստեղծը հպարտությամբ է նշում. «Ես չորս տղայ ունեմ, չորսն էլ երկրի կառավարութեան, Ազգային խորհրդի եւ քո տրամադրութեան տակ են, իսկ չորս աղջիկս էլ պատրաստական գնում են թիկունքի աշխատանքներին, ինչի որ ընդունակ կլինեն....» (անդ, 23 դեկտեմբերի 1917)։

Բանաստեղծի անկեղծ խոստովանանքը Չորավարի եւ հայրենի ժողովրդի առջեւ Հափազանց հուզիչ է հնչում. «Ես էլ ամշուշտ, սրանից թանկ ոչինչ չունեմ, հետեւաբար ոչինչ չեմ խնայել, միայն թէ կարողանանք բոլոր ազնիւ ժողովուրդների եւ ազատասէր հոգիների հետ յետ մղել վերահաս վտանգը եւ պաշտպանել ամենքիս սրբազան իրաւունքներն ու ազատութիւնը» (անդ)։

1917 թ. դեկտեմբերի 29-ին «Հայաստան» պարբերականում հրապարակվեց պատասխան մամակ-արձագանքը՝ ուղղված Հովհաննես Թումանյանին, որում դրվատանքի խոսքեր են հնչում բանաստեղծի հայրենամուկ վարք ու բարքի վերաբերյալ. «Ես հրճուանքով կարդացի նամակդ, հասած է ժամը, որ բոլոր նմանիք բեզի՝ տրամադրելի ընելով իրենց զաւակները եւ դրամը հայրենիքի պաշտպանութեան գործին։ Պէտք է մոռնաք պահ մը գրիչը՝ փոխարինելով սուրին՝ ստեղծելու համար հայրենիքը, որում խաղաղ ծոցին մէջ միայն կծաղկի գեղարուեստի կեանքը....» (անդ, 29 դեկտեմբերի 1917)։

Չորավարը հույս է հայտնում, որ հայ մտավորականությունը հետեւելու է Հովհաննես Թումանյանի օրինակին, որով պիտի դարբնվի հայոց սրբազան ազատությունը։

Ահա այսպիսի գործունեություն են ծավալել հայոց մտքի եւ բազկի մեծանուն վարպետները՝ Հովհաննես Թումանյանն ու Անդրանիկը, հայրենիքի համար ճակատագրորեն ծանրագույն պահերին։

Միով բանիվ՝ Հովհաննես Թումանյանի եւ Չորավար Անդրանիկի մտերմությունն ու համագործակցությունը հայ ազգային քաղաքական պատմության լուսավոր եւ հուզախոռվ էջերից են։ Հայրենիքի համար դժոճակ պահերին նրանք հանդես են եկել միասին՝ իրենց ուսերին առնելով վիթխարի պատասխանատվություն ներկա ու գալիք սերունդների առջեւ։ Նրանց կյանքն ու գործը, թողած դասերն ու պատգամները հայրենիքին ամնմացող ու մինչեւ վերջ նվիրվելու լավագույն օրինակներն են։

Արմեն ԿԱՐՊԵՏՅԱՆ
Պատմական գիտ. թեկնածու

Վրեժխնդրության պտուղը



Մի անգամ հովիվը վիրավորեց մի մարդու։ Այս մարդն էլ չարացավ հովվի դեմ եւ որոշեց վրեժխնդիր լինել նրանից։ Նա իր չար մտադրության իրագործման համար հատուկ օր ընտրեց եւ ուշ գիշերով սկսեց փոս փորել։ Այդ փոսը փորելիս նա պատկերացնում էր, թե ինչպես է իրեն վիրավորող հովիվն ընկնում դրա մեջ եւ վնասվում։

Կամ, իր համար «վատագույն» դեպքում, հովվի ոչխարները կընկնեն այդ փոսի մեջ։ Նա երկար ու ջանասիրաբար փորեց՝ երազելով վրեժխնդիր լինելու մասին եւ անգամ չնկատեց, թե ինչպես է փոսը հետզհետեւ ավելի ու ավելի խորը դառնում։ Այս մարդը չնկատեց էլ, թե ինչպես լուսացավ. հանկարծ նա մայեց ծագող արեգակին եւ այդժամ միայն կարծես դուրս ելավ իր չարարար մտքերի հորձանուտից։ Եվ որքան մեծ եղավ նրա զարմանքը, երբ տե-

սավ, որ այդ ընթացքում այնքան խոր փոս է փորել, որից ինքն էլ այլեւս չի կարող դուրս գալ։

Նախքան ուրիշի համար փոս փորելը, նույնիսկ եթե դա անում ես մտքում, պետք է հիշել հետեւյալը. փոս փորելու համար նախ դու ինքդ ես հայտնվելու դրա մեջ, քանի որ փորողն առաջինն է ոտք դնում փոսի մեջ։ Եվ ինչ-որ մեկի վրա ցելի շարտելիս էլ մախեւառաջ հենց քո ձեռքերն են կեղտոտում....

«Ահավասիկ, ով որ անօրենություն երկնեց, չարիք հղացավ եւ անիրավություն ծնեց, նա փոս փորեց, խորացրեց, հենց ինքն էլ ընկավ այն փոսը, որ ինքը պատրաստեց....» (Սաղմ. Է 15—16)։

Պատրաստեց
ԱՆՆԱ ՀՈՎՍԵՓՅԱՆԸ

Զմրուխտ վազերի սգերգը

← էջ 6

Խանդավառ էր նա թե՛ աշխատանքում եւ թե՛ խնջույքներում...

Հեկտարաչափ այգին, այգու հետ մեկ վազի հանդեպ պաշտամունքի հասնող անհազ սերը մա տոհմիկ այգեգործ պապերից է ժառանգել վազին, ինչպես իր մանկկյանը, միշտ գորովանք, խանդաղատանք... Թե որ այգաբացին սիրտն ուզել է մեկ-երկու ճուր սառը, ցողաթաթախ, շաղոտ-շողոտ խաղող վայելել, փարվել է նույն վազին ու երախտիքի խոսքեր շնչացել՝ «Ես ինչ անուշ ի պտուղդ, մոլ ջան, ես քո էդ քոք ու բուսին մատաղ...»:

Դեռ երկու-երեք շաբաթ առաջ նրա սիրտը թրթռում, բերկրում էր, որ տարին բարեկից է, չարաղետ կարկուտն այս անգամ վնաս չտվեց, եւ շուտով՝ աշման այգեկու-թին, բարով-խերով 10–12 տոննա բերք կհավաքի, այն էլ՝ Հայաստան աշխարհի ամենաբաղձը՝ «Ոսկեհատ» («Խարջի») տեսակի խաղող: Իսկ հիմա... Ինչ է՝ սատանան լսեց ուրախ սրտի բաբախը... Ողկոյզի հյութալցման այս վճռորոշ օրերին, երբ օրը տարի է կերակրում, իր այնքան խնամած պապենական այգին աչքի առաջ ծարավից տոչորվել, թռչնել, մահանում է օր օրի, ժամ առ ժամ... Հիրավի, սիզիփոսյան աշխատանք եղավ արած-դրածը...

Կրակ է մաղվում Գեղամի գլխին, կարծր ապառաժի է հանդիպել. մայր առվի ջրի գործը վարողը՝ ջուրվար Թաթոյի Համոն, հակառակվել, այգու հասանելիք ջուրն այս շոգ ու կրակին չի տալիս... արդեն երեք շաբաթ... Եղավ, որ Գեղամը Սեւանի կողմերն իր պատվարածան քավորի հոգեհանգստին ու հուղարկավորությանը գնաց:

Գյուղից նրա բացակայելու նույն օրերին ջուրվար Համոն Հիլինգարենց ջրբողից սնվող այգիներին առատ ջուր բաշխեց ու այնպես ձգեց պնդողակը, որ կաթիլ անգամ չէր ծնծնում: Հետո լքեցին, գործի տիրական պատվախնդրությամբ, ասես պետական բանկի գանձատունն է կապարակնքում, Համոն խոշոր պիներով տիղմացել սվաղեց ջրփակի թիթեղի հակառակ երեսին, վրան դրեց ջուրվարի՝ իր ինքնության խորհրդանիշ բազմակյուն բանալու խոր դրոշմը (իր խոսքով՝ պեշատը), ապա գնաց մյուս թաղամասերին ջուր բաժանելու:

Վերջ, մինչեւ հաջորդ ջրտուլը որեւէ ուրիշ ձեռք չի հանդիմնի նրա դրած դրոշմակնիքը խախտել, բանալ ջրփակը: Իսկ թե բան է, օրերից մեկ օր գտնվել անհամբեր մեկը եւ գիշերը ինքնագլուխ բացեր ջրփակն ու ջուր գողանալ, ծ, ծանր կլինեի Համոյի պատիժը:

Առավոտվա ստուգայցին կնկատեր խախտված նշանը, կկատարեր, կմոռացար ինչպես առյուծը ջունգլիներում եւ վայրի կենդանու հետքը տանող որսորդի կրթությունը կգնար թաց առվով, կգտներ օրինախախտին, ու վաճ սրան... Դատաստանն ինքը կաներ. կհերտոտեր, կբղավեր, ձեռքի անբաժան երկաթե ծանր բանալին կիջեցներ նրա թիկունքին, տուգանել կտար ու դեռ ի՞նչ կպահեր. անջուր թողնելով՝ կչորացներ նրա բանջարանոցն ու այգին:

— Իմ ասածն օրենք ի, իմ տրած պեշատը քանդողն էլ հլա մորուց չի ծնվիր,— բանալին վճիռ արձակող դատավորի պես բարձրացնում եւ ի սարսափ ջրօգտագործողների՝ հաճախ հոխորտուն, հիշեցնում էր դաժանաբար ջուրվար Համոն:

...Հավիտենական է ջրի խնդիրը: Հնուն առասպելաբանում էին, թե ջրի ակունքներում դեւեր ու վիշապներ կան: Շատ գյուղացիների աչքում հիմա դեւն էլ, վիշապն էլ Թաթոյի Համոն է... Հիրավի, ազդեցիկ այր էր ջուրվար-ջրբաժանը իր գյուղում, քանզի նրա ձեռքում էին ջրի փակն ու բանալին: Իրական իշխանություն ուներ նա հողագործների վրա. ուն այգու, արտի, բանջարանոցի ջուրը ժամանակին չհասցներ, վտանգելու էր նրա տարվա ապրուստը:

Գյուղի երեք ջրանցքներից գիշեր-ցերեկ ջուր բաշխող, բարի անուն թողած, «օղորմի»-ով հիշվող ջուրվարներ են եղել Գեղորգ Գյուրջյանը, Գերասիմ Դարիբյանը, Միթեա-



նի Հրայրը, Սիրոյի Վազգոն, էլի ուրիշները: Համոն նրանց շարքում չկա...

Ջուրվարները, սակայն, որքան էլ արդարացիորեն բաժանեին բնության պարգև կենսարար հեղուկը, այնուամենայնիվ, գյուղի՝ մանավանդ վերին երկու սակավաջուր ջրատարների վրա շոգ անձամբ անպակաս էին վեճերն ու ծեծկռտուքը: Ջրի պատճառով իրարից խռոված դրկիցներն Ամառորին հաշտվում էին, ապրում խաղաղ, մարդավայել միմեջ... մինչեւ թե՛ ամռան ոռոգման մոր շրջանը...

Եվ ամեն ինչ կրկնվում, դառնում էր ի շրջանս յուր...

Մայր առուն անհամեմատ ջրառատ էր, ուր ոռոգման խնդիրներ, վեճեր ընդհանրապես կարող էին եւ չլինել, սակայն... չէ՞ որ այստեղ ջրի գործը վարողը ինքը վեճեր հրահրող, կռվական Թաթոյի Համոն էր... Չարաշահելով իր վերադասների՝ ջրպանների եւ գյուղական իշխանության վստահությունն ու հովանավորչությունը՝ նա տարեցտարի ավելի կամակոր, իր ասածի ու սանձարձակ էր դառնում: Նաեւ՝ ինքնիշխան...

Նրա մասին իզուր չէր վարժապետ Վարդան Սենեքերիմյանը սրախոսել, թե՛ «Ոռոգման շրջանում էս մեր գյուղացի Թաթոյի Համոն իրեն եզրիպտական փարավոն Թուրանիան է կարծում...»:

Այն հեռավոր օրը, երբ Համոն ջուրվար էր նշանակվել, գյուղում հարգված, իմաստախոս ծերունի, բիթխիսի Բաղդասար ապերը շնորհավորել էր նրան ու բարեկամաբար ասել.

— Համո՛ւ տղա, մարդոց հետ պիտի աշխատիս. Էնքան քաղցր չեղնիս, որ քեզ կըլլեցուն, ոչ էլ Էնքան դառը, որ թըըցուն...

Համոն գնալով դառնացավ ու դառնացավ... Ջրի որ հանգույցի մոտ աղմուկ ու վեճ կար, այնտեղ Համոն էր:

Բաղդասար ապերը նրան երկրորդ ու վերջին անգամ ասել էր.

— Տղա՛ Համո, հերիք չէ՛ կռիվ-դալմադալներ սարքիս... Իմացիր, օր մը պատվասեր մեկը զովադ կիշրի... Տղա՛, դու ջուրը մարդոց քաղցր խոսքով բաժնե, որ ծառի պտուղ լե անուշնա, համ էլ Աստված բարի գործերդ կտեսնի, քեզ լե ձագուկներ կուտա...

Համոն ականջալուր չեղավ, մնաց իր կերպի, իր պատյանի մեջ...

Վերադարձին Գեղամը մոտեցավ ջուրվարին, ասաց գուղից իր բացակայելու հարգելի պատճառը, մարդավարի խնդրեց, որ ծարավ այգուն ջուր տա:

Համոն... չհարգեց... Դեռ մտքում ուրախացավ, որ Գեղամի պես «մարդամիջի մարդը», հաջողակ «որսը» հիմա բռնում է: Այս մասին նա հաճույքով կիրազեկի կոլտնտեսության ղեկավարությանը, Գեղամի այգու ջուրը կծգծգեն, անելանելի վիճակի կհասցեն, եւ նա ճարահատյալ «կոլտնտ

կգրվի», ու նրան աչք կդնեն իր պես երիտասարդ ուրիշ ընտանիքներ:

— Չեմ տա՛,— հոխորտաց Համոն,— մինչեւ ճրի հերթի օրը ես իմ տրած պեշատը ոչ մե անհատ մարդու խմար չեմ քանդի:

Գեղամը տուն դարձավ: Նա մտքում մեքեք ջուրվարին՝ մտածելով, որ Համոն տրամադրության մարդ է. «Երեւի էսօր քեքը տեղը չէր», վաղը կամ մյուս օրը կստանա այգու հասանելիք ջուրը:

Գեղամի հաջորդ այցին Համոն բավական հանգիստ ու անհոգ ասաց.

— Քեղամ տղա, ցավես եմ, որ քո գնացք էր, պոեզդ էր, էկավ-կմաց՝ տու ուշացար... Ծուրդ մնաց մեկել հերթին...

— Համո՛ւ ախպեր, ախր ի՞նչ պոեզ, ի՞նչ պեշատ... Ծրի փակն էլ, պեշատն էլ քո ձեռք չի՞, ասա մտքիդ ըմի... Համո՛ւ ջան, օղորմի անցավորներիդ, աղեկ կանես՝ փեշիդ քաղը թափես, ճուրս տաս, մեր խնդիրքը վերջանա՛,— թախանձազին տոնով խնդրեց Գեղամը:

Համոն էլի անդդվելի, նույն անկարելիցը մնաց:

— Խելքդ յ՞րբ ի... Ուրեմն, մեր հարազատ կոլխոզի էքստարի ճուրը փակեմ, քեզ պես անհատ տնտեսությանը տամ... Ասիր եմ, խոսքիս տերն եմ. ճուրդ՝ մեկել հերթին,— անվորով ասաց ջուրվարը, կտրուկ շուռ եկավ, որ Ակոբենց տանձեմիների տակով անցնող խոխոջուն առվի ջրի հետ իջնի կոլտնտեսության մեծատարած այգեստանը:

Գեղամն առջեւը կտրեց.

— Էդ ընձի արդեն ձեռն ես առնելի, խա՛մ... Մեկել հերթին քո տված ճուրն էլ ընչիս ի պետք... Որ մեռելին ճուր տաս, կգարթնի՛,— զայրացավ Գեղամը:

— Լավ, կուզես քեյ կոլխոզի գրասենյակ, բողոքի: Թող կարգադրեն՝ ճուրդ տամ,— ծածկատորեն ասաց Համոն ու մեծ-մեծ լոքեր անելով՝ արագ հեռացավ:

Գեղամը մտազբաղ շփեց ճակատը: Նրա ականջներում դեռ ջուրվարի վերջին խոսքն էր՝ «Կուզես քեյ կոլխոզի գրասենյակ...»:

Նրան արդեն իսկ պարզ էր, որ հենց Համոյի նախաձեռնությամբ, նրա «սարքած գործով» իրեն կոլխոզի գրասենյակ կամ որ մույնն է՝ դեպի թակարդ են ուղղորդում: Եթե գրասենյակ գնա, գիտե՛ այնտեղ շատ պատրաստական ասելու են. «Այ դու բարով, հազար բարին եկար, ընկեր Գեղամ Սարգսյան:— Սա քեզ թուղթ ու գրիչ, դիմում գրի, կոլտնտեսության անդամ կընդունենք, իսկ այգուդ ջուրը... հենց հիմա գնա ու ջրի...»:

Մինչդեռ գրասենյակ տանող ճամփան Գեղամի համար փակ է դեռելս այն չարաբաստիկ օրվանից, երբ իր աչքերով տեսավ, թե ինչպես «անհավատ մի շանորդի», գյուղխորհրդի ու կոլտնտեսության մախագահների հրահանգով, տասը աշխօր պարգեւավճարով, գյուղի Ս. Հովհաննես եկեղեցու գմբեթի հնադարյան խաչը ուժով

տեղահանեց ու... մետեց ցած... Եկեղեցին կոլտնտեսության պահեստ դարձրին. դռները հավատացյալների առջեւ փակեցին, լուսամուտները՝ ճտատեր ծիծեռնակների ու տատրակ աղավնիների:

Գեղամի զգայուն սիրտը փոթորկվեց, ըմբոստացավ... Նույն միջոցին նա ուխտեց՝ «Չէ, կոլխոզ չեմ գրվի...»:

1930-ականների սկզբին Խորհրդային ամբողջ երկրով մեկ շարունակվում էր կոլտնտեսությունների կազմավորումը: Չնայած անդամագրումը հայտարարված էր՝ «կամավորության սկզբունքով», սակայն իրականում այն հաճախ պարտադրվում էր... Անդամագրվողը մորաստեղծ կոլեկտիվ տնտեսությանը՝ կոլխոզին, իր անձնական նյութական ներդրումն ու նպաստը պիտի բերեր՝ անհատույց հանձնելով հողատարածքներ, ընտանի կենդանիներ, գութանը՝ եզներով, իր իսկ աշխատուժը...

Գեղամի համար էլ էին «պահված» համակարգային ընդհատակյա խոթեր ու որոգայթներ: Եթե նա անդամագրվեր կոլտնտեսությանը (եթե, իհարկե, անդամագրվեր...), ապա «հարազատ կոլխոզին» պիտի «նվիրեր» ծով քրտինքով մշակած այգին՝ առկա բերքով, որից միայն 1/6-րդ մասը կթողնեին իրեն, կամ՝ 103 թմբից 16—17-ը... Կոլխոզի մառան կտանեին մաե իր գինու-օղու կարասներն ու տակառները: Գեղամը կդառնար շարքային կոլտնտեսական կամ, ասեմք թե, որպես միջնակարգ կրթություն ունեցող, կնշանակվեր բրիգադիր: Այս դեպքում էլ դժգույն ապագա էր սպասում նրան. մյուս կոլտնտեսականների հետ կմշակեր մաե... իր նախկին այգին, որի համար, որպես վարձատրություն, կստանար աշխօրեր՝ չնչին դրամ եւ ընդամենը կենսապահ բնամթերք...

Ծանր դիվեմայի՝ երկըմտություն առջեւ է մա. կոլխոզ մտնի՝ ստանա ջուրը՝ փրկելով այգու եւ բերքի մի մասը, թե՛ չանդամագրվի, եւ այգին չորանա, վերջանա... Հապա պատիվը... Լինելու բանն է՝ ինքը չորացնի իր սեր-վաճը... «Ախր այգեգործ պապերիս ոսկորները տեղում ժաժ կզան»։ Նրա մտքով այն էլ էր անցնում, որ եթե անգամ գյուղից չբացակայեր, մյուսների պես ջրեր այգին, հավաքեր բերքը, միեւնույն է, իշխանությունը չէր հանդուրժի, որ իր ձեռքում մնար հեկտարահար ընտիր այգին: Կառաջարկեին այն կամովին հանձնել կոլտնտեսությանը, իսկ հրաժարվելու դեպքում, որպես «պետության կուրսին չաջակցող կուլակ», «վնասարար» կամ մամորինակ այլ պիտակավորումներով խլելու էին այգին ու դեռ իրեն էլ դատապարտելու էին... Ստալինիզմի չարագույժ, ահասարսուռ ստվերն ամենուր էր...

Վարժապետ Վարդան Սենեքերիմյանն այս իրավիճակի առնչությամբ մի տեղ ասել է. «Կոնֆլիկտ է հասունացել, որի հանգուցալուծումն անխուսափելի է...»:

Շարունակելի

Սերժ ՄԱՆՈՒԿՅԱՆ

ՔՐԻՍՏՈՆՅԱՐԱՆ ԳԵՂԱՐՈՒՄ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան» թերթի խմբագրություն

Գլխավոր խմբագիր՝

Արփիմե Չամբիկյան

Գրանցման վկայական՝ 624
Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

gristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 25.10.2022 թ.

Տպագրանակը՝ 1225